


屠氏昆陵支譜

卷四

本

254
7726
4

支譜卷四



我屠氏自始祖本泉公元季遷常迄今二十世矣



來士農工商各有恒業碩德懿行代不乏人記曰先祖無美而稱之是誣也有美而弗知不明也知而弗傳不仁也嘉慶九年重修毘陵支譜未立志傳今續修支譜而使祖宗行誼泯沒無聞是蹈不仁不明之咎不能告無罪於先人也明初仲亨公導徽商販木千章泊於青山門外商人感其信義至者踵接爲子孫開衣食之源中孚公獨賑一

鄉與參公首倡義賑春園公代償巨萬義行昭然溯先世以武功起家英宗特賜清忠謹厚明敏勤勞八字表其閭其後官郎署厯繁劇均有著稱卽根岩以丞尉末秩瘴雨蠻烟勤勞沒於王事得邀贈廕燦宇公入祀郡中孝子祠後以孝行著者有宗武諸公節孝節烈貞節已旌未旌者共若干人吾族雖不足頡頏王謝而忠孝節義數大端均足明示後世爲子孫效法至女子已嫁而能大節不渝亦足爲宗族光寵無忝姆教也金節婦傳並附志焉

屠氏遷常始祖本泉府君墓表

陸慶頤撰

記曰別子爲祖繼別爲宗此百世不遷之宗也自變封建爲郡縣仕無世祿由是宗法不行後世師其意奉初有封爵者爲始祖或聚族而居奉始遷祖祀之亦皆陰行宗法於古不合於禮無悖者也吾常屠氏祀本泉府君爲遷常始祖府君諱明先世自汴徙鄞後避倭寇轉遷上虞縣錦龍鄉蛾眉村元季兵亂府君偕二子長仲亨次仲實避兵蘇州卜居於常寓子城廂金斗坊北郡治之州橋至正二十六年卒葬青山門外社稷壇東北隅上甯行以次子仲

實從明太祖征討有功追贈武德將軍顧自前明逮我

國朝迄今將五百年伐石之詞未具今十六世孫維聰重

修族譜請誌府君墓慶頤固辭不獲謹繹禮文古今宗祀

之所以異并據府君曾孫良玉所記備錄遷常本末著於

阡俾屠氏世世子孫有考焉

咸豐五年秋八月武進陸慶頤表

烈天遷常帶脈木泉自許章表

陸慶頤

仲亨公傳一世

陸慶頤撰

司馬子長有言居之一歲種之以穀十歲樹之以木百歲
來之以德又言以末致財用本守之其言與大學德本財
末之旨相合顧周官九職任萬民六曰商賈阜通貨賄皆
有常職定其耳目閑其心思俾不遷於異物管仲猶用以
治齊蓋自龍斷術興欲商循族世之所鬻固已難矣同邑
青山里屠氏多習木業相傳自仲亨贈君始元季隨父遷
常州明洪武五年從武進縣受民帖隸子城廂時有徽商
李氏兄弟二人販木千章至導泊青山門外隙地爲主發

賣時當兵燹之後學宮官舍皆傾頽有司責成修葺建造
蠲貲賠費無累商人由是商感其義至者踵相接非所謂
來之以德者耶抑舍德將奚由守也吾聞耕祀先嗇桑祀
先蠶古人飲食必祭先代始爲飲食之人以明飲水思源
之義矧爲子孫開衣食之原迄今將五百年世守勿失則
贈君之德烏可一日忘哉子六文榮文華文顯文達文忠
文孝以文顯貴贈刑部山西司主事洪武十一年卒葬父
塋之次

仲實公傳

子貳孫斌附

二世三世四世

陸慶頤撰

屠氏居常者皆仲亨公後人有弟曰仲實則自明初遷居燕京與常州屠氏異派同源者也初從湯襄武王和屢立戰功洪武三年調南京金吾左衛五年撥從太宗調燕山左護衛十五年卒北京阜城門外子貳代三十二年貳從李明道守城有功永樂改元授本所總旗差往西洋諸國公幹還對稱旨三年升金吾左衛所世襲所鎮撫性靈敏多智善辨奇珍寶物再受朝命遣往西洋涉歷諸處所得甚夥回至海洋病卒時永樂六年四月初三日也子斌於

十年襲職正統二年斌悉以父所賚寶物進獻朝廷嘉其廉節特賜清忠謹厚明敏勤勞八字以表其閭凡上用之物概命置買并遣辨驗寶物日加恩賚無子止生一女贅張宗順謂宗順曰吾年老矣當申奏朝廷改汝姓氏暫領吾職發書遣使取常州本支承襲未至正統七年十一月卒於京師之咸宜坊後嗣兄良玉子斯芝斯甯並襲職

陸慶頤曰聞故老言明初湯襄武下常州軍政嚴肅酒後往往殺人屠氏之先有從麾下者多所全活公卽其人耶抑奉伯兄之教陰成活人之德耶旅獒言不寶遠物若數

千載以前早鑒遠物流毒中國者人臣奉使不避難卒於
海洋哀哉子能不私一物其廉足稱或以再傳無子爲公
惜是不知兄弟之子猶子斯薄俗之論矣

文榮公兄弟合傳

三世

陸慶頤撰

文榮屠君祖諱明父諱仲亨同懷六人文華文顯文達文忠文孝皆其弟也初爲尹虎兒口報事洪武十六年充南京虎賁左衛軍十九年以老乞休弟文顯代子三良士良貴良玉傳至九世曰櫨曰橋曰樸曰梓樸四世孫象乾象謙遷居越中不與常之族人通音問久矣其餘散居鄉鎮文顯諸生自洪武十九年代兄文榮居南京長翰墨明察有異才從行伍受知明太祖擢刑部山西司主事掌刑獄因事棄職黔甯王沐憐其才請從征雲南參贊軍務以功

補過洪武二十三年解送象隻赴京回籍祭祖時仲氏文華已歿遺孤良能無依已又無子遂攜良能往自此文華文顯子孫居雲南文達亦諸生品醕學粹當代知名子三良可良德良政今居常者多其子孫文忠子二良富良敬傳至二世無後文孝子二良俊良傑後裔今居新聞咸豐五年屠氏修譜深以雲南遠隔萬里不獲訪文華文顯後人爲憾文忠再傳無子惜未爲立後而大宗文榮支舊譜載橋之後遷居江陰東劉墅今仍采訪未得近得樸之後由越省遷居蘇州官海甯州吏目名大鏞者以書來具述

年久失修祠當補進者十六主屠之族人請爲仲亨公以下補立家傳幸大宗之有後并附書傳末

陸慶頤曰兄弟具文武才或拱衛神京或立功萬里不肯低頭草莽老死牖下氣何壯也夫神猶水也水無不之當一堂合食固非存沒有異山川能阻然後之人猶生遠莫致之之感幸得朝夕聚首者奚忍淡然忘之常棣之詩曰凡今之人莫如兄弟願吾儕三復斯言

良玉公傳

子斯芝斯甯孫節附

四世五世六世

陸慶頤撰

贈君諱良玉屠氏始遷常州諱明之曾孫文榮之長子子
四斯蕙斯蘭斯芝斯甯以孫節襲從兄斌職贈昭信校尉
金吾衛鎮撫先是贈君季子斯甯襲斌職於正統十三年
卒無子以斯芝暫襲斌職抵京後家資悉讓姊壻張宗順
惟受屋一隅而已景泰六年十二月廿七日上嘉斯芝勤
敏善幹辦且追念斌服官忠藎升錦衣衛百戶節斯蘭次
子襲伯祖斌職歷升錦衣右千戶所帶俸所鎮撫授忠顯
校尉職係叔父斯芝借襲後讓還弱冠入朝命直南薰殿

掌繪事主眷日隆而清貧自若斯芝舊有墳庄一所居第一所被豪閹占踞節代敏清申請得直賜還子三孟暘孟暉孟昕

陸慶頤曰斯芝暫領斌職家資悉讓姊壻與世之爭繼爭產者不大相徑庭哉節貴而能貧清矣不畏豪閹又何毅也贈鎮撫君因先世播遷致軼宗譜手錄世系記俾後之人傳信無疑其有功於家乘最大

開九公傳

九世

陸慶頤謨

君諱宏懿祖樸父維燁錦衣衛指揮僉事母張氏封安人
有子二人君其長也原名夢龍字雲伯號開九崇禎壬午
科舉人世襲錦衣衛千戶洊升揮使屠氏始遷祖墓碑君
所立也後因國變棄官披薙入山號赤眼師無子繼弟宏
遠長子象乾爲子生萬厯十一年順治十年卒葬阮墅
陸慶頤曰棄官爲僧與死節之臣有間矣然恥事兩朝爲
臣之大節無虧忠義未泯於人心行實備書於世表爰補
立傳如右

厚且良陔三言
謹案道光六年浙省所寄世系宏懿公係樸公後大宗
無出繼弟宏遠之子象謙爲嗣据此象謙公本係宏懿
公嗣子宏懿公以名孝廉因國變棄官大節卓著理宜
立後而咸豐五年采訪新稿云象乾以下無考則宏懿
公之後嗣續闕如今据道光六年所寄世系以象謙公
之後分承宏懿公嗣著於篇

十四世孫應詮謹識

中孚公傳

十世

陸慶頤謨

慶頤年十七從王敬堂師學師執友晉望吳先生銘我屠
先生來塾講學命慶頤侍聽外出亦命隨行先府君與屠
先生交舊敬屠先生爲篤行君子嘉慶丁丑九月府君六
十生辰吾師偕屠先生言於吳先生爲文以壽痛府君未
及七十棄養慶頤所以銘感先生者至今不敢忘今歲屠
氏修譜屢晤先生文孫煥文端重謹飭守家法慶頤追述
疇昔歉然泣然承示先生著述女範一篇關繫風教尤大
旋示菽水盡歡圖并知先生父殿英先生之孝母萬太孺

人之節益知先生其原有自俄而屠之族人請爲先世補傳由是更知中孚府君乃殿英孝子之曾大父銘莪先生之高祖考也府君諱之珍字鍾甫號中孚齒德俱尊爲鄉閭矜式歲歉嘗出家財獨振一鄉方伯慕公贈義風追范額生前明天啟二年康熙三十八年卒春秋七十有八子九人孫二十有二人夫年臻大耋子孫多賢乾道不貳固已章章如是三傳四傳復得殿英先生父子天之報施善人豈僅在區區富貴利達間哉惟以四十年前隨侍小子爲闡揚先世舊德此慶頤所悚惕而不能自己者也

與參公傳 十一世

陸慶頤撰

鄉耆屠先生諱贊儀字與參生於前明天啟四年幼英敏長而折節讀書見所尊必齋肅立身行已謹守法度嘗服鷹程子存心愛物之訓求於物有濟迨鼎革後無意進取爰棄儒習賈家頗饒裕性復慷慨族戚昏喪周恤無怠有稱貸者未嘗吝出納權子母歲久卽出券焚之康熙四十六年歲大旱首倡義賑鄉人賴以存活事竣郡守章公贈德沐恩波額爲好善樂施者勸焉越五載考終青山里居第春秋八十有八子三人錫疇錫公錫侯

陸慶頤曰吾友屠君潤芝爲予言吾宗修祠宇則有族弟
洪培產僅中人勇於蠲輸朝夕經理孳孳不倦修家乘則
重賴族弟洪樹實心任事和顏共商兩君皆先生後也旋
偕潤芝屬慶頤謨先生家傳夫前人潛德未光卽其後嗣
多賢猶可想見培植之深貽謀之遠矧歲旱拯荒仁及鄉
閭如先生者哉耄耄好德天錫之福有明徵矣

與參公樹

十一世

刻與則歸

元來公傳 十二世

元孫琪謹述

高祖考元來公去今百有餘載人咸稱爲屠孝子相傳孝子美鬚髯衣冠古樸生平未嘗有疾言遽色琪憶幼時自書塾夜歸侍府君側府君執小子手而言曰爾高祖考元來公事父諱鍾嶽公先意承志委折纖悉無不周至鍾嶽公或赴燕或與親朋叙話每至夜分公伺候門外鍾嶽公見公門外佇立問曰爾得毋久候乎則對曰適至耳其善承親意大率類此歲丁酉府君棄養迄今已二十餘年矣公不求人知而人亦遂無知公者然惟公不求人知而公

衡吾公傳

十三世

同里李瑞岡撰

君諱洪銓字衡吾世居北門外青山里尊人豈凡先生性豪邁貲產不踰中人而性好施與既歿遺有積逋兩兄相繼謝世君以一身承其支誦鬻腴產以償有爲之惋惜者曰留產以負人吾父魂魄不安則爲子者寢處不甯也閱數年而債皆清償家業亦漸起姪早孤幼弱君卵翼之從姪某以逋項被訟貧無以爲計君請於官代償之叔迴凡謝世身後事宜及叔母饗殮君經紀之無稍缺有過客泰州人茅姓者中寒死斗巷橋下君解囊爲棺殮之且助資

令茅之姪得返故里其生平行誼類如此夫親親仁民事
有先後君篤於一本之誼故能推及其餘行有死人尙或
埋之凡民有喪匍匐救之非有所強而然發於心之不得
已也蓋有所本也彼薄於宗支而厚及他姓固無此理而
或煦煦爲仁本根缺焉則亦一時好名之所爲非恃源而
往者矣君沉靜少言語所爲善行未嘗一出諸口嗚呼此
君之所以能行善行也歟君享年五十有五配許孺人克
相其夫子人三長次早世季子曰來怡亦克承先緒者

殿英公事畧

十三世

男南琛述

府君幼時聰慧循謹聞徐孺人述古先孝友事輒欣然忘
倦能識其大意尊長有所指使咸知承順服勞凡伯叔父
母靡不得其歡心徐孺人特鍾愛焉

府君痛幼年失怙庭訓無聞有以不屑教之言相責讓者
府君發憤自勵長猶感佩斯語以爲生平得力在是故嘗
敦敬耆德奉爲師資終身優禮取法焉
府君受業中表鄒乾學先生中年寒苦遺贈迨無虛月恒
念困阨時凡有恩禮於我者圖報維殷猶諄囑家人兢兢

在念至與人共事務推逸任勞飲食必均一有所委任不特計其身之勞苦并其家之緩急亦預爲部署焉
府君持已甚嚴雖私居未聞笑語長幼內外見之靡不肅然然性惡紛爭有以口角相質問者府君曰於理固有曲直第其爲不能相讓等耳况我自恃其直又有以激其爭乎故生平與物無忤而人亦服其雅量云

府君奉身至約生平未嘗製一華服自承祭奉親宿客之外不敢特烹一鮮迨至疾病之時猶不欲異饌而食葢念本生祖母饗飧不繼之年有對食而不能下咽者

菽水盡歡圖序
吳士模撰

士模觀歷代史傳奇節偉行非常之功則必摹畫而詳著之於孝友獨行則加略焉必遇事變遭橫逆乃得著錄安常處順盡其門內之行而不過乎則則幾無傳既而思人受天地之中以生其理皆備於我然必形于所接而各効其情常變不同易地皆然也而君子猶以非常之行爲賢智之可勉而居常盡道則幾幾乎難能雖史家常事不書之例不得而訾議之而君子之泯泯無聞者不少矣夫君子之行慊乎吾心之所當然與吾性之不獲自己人之不

知固無所憾而爲世道人心計者不能使微者顯幽者著則人何所勉而奮焉況乎其爲子孫者於祖父之懿美而泯泯無聞尤有所大不忍也同邑屠君殿英諱端立幼嗣其叔父弈彩翁翁固貧而本生母徐孺人少寡尤窮空不自給每午飯君輒持所食以奉徐孺人往往枵腹終日不令兩親知也是時君年才十有五耳比長棄舉子業學商賈家稍稍裕而居常食不兼味疾病不少變蓋少時見其母之困每食不能忘也君之子南琛繪其事爲圖而屬士模爲之序模惟君之所爲蓋所謂盡其門內之行而不過

乎則者夫視其親之不飽而輟所食以食之此同然之心也然使其親覺焉則其心必不安而其事遂不得而自盡如君之委曲調護期於必致其情蓋尤難矣而顧以門內之行不獲登諸史乘又君之卒也年未四十而南琛方在襁褓故其事不眾著於人南琛之爲君事略也幾千餘言其列於別紙者又數百言其於承親奉師睦族恤嫻之事言之尤悉然模謂孝者爲仁之本也觀於是圖可慨已世之觀是圖者知君之勢處其難而有以自達如此則所以油然而生其孝弟之心而實自致於倫紀之地者雖遇事變

屠曰昆陽三言
遭橫逆如史傳所紀奇節偉行非常之功又何難焉是圖
之作豈徒表揚其先德蓋所繫於世道人心者尤切也南
琛少孤好學於爲善若嗜欲篤行君子也人語其美則皇
然愧生模欲體南琛之志而不能已於言者使人知孝子
之有後附於國人皆願然之義而南琛當益思貽其親以
令名於勿替也古人之言孝至於斷一樹殺一獸猶兢兢
焉孝子之量豈有盡耶

菽水盡歡圖跋

畢涵

殿英先生余友南琛之父也先生性至孝幼嗣其叔父弈

采翁翁固貧而本生母徐孺人尤饘粥不給先生常節午餐以奉之往往終日枵腹弗令兩親知心良苦矣南琛追思其事不能去懷者幾三十年丁巳孟夏屬余寫圖余感其意閱旬日而成焉是圖也在先生雲仍見之固宜奉栢圈而不能飲若使江次翁王延元者遇之其相感當何如

耶風烈文辭科五言詩
菽水盡歡圖詩

附

畢應箕

昔聞漢茅容殺雞供母餐草蔬與客飯千載名不刊西河王延元曠世若同氣隆冬無全衣養親極滋味咄哉今時

人輕重胡不分佳肴不將母割肉遺細君卓卓屠孝子垂
髻後叔氏節食奉慈幃不虞楊腹死令子每念茲悽愴淚
如馳摩繪昔日景悠悠令人思春泉繞茆屋春露滴新竹
輕風吹衣裾捧盃情穆穆嗟余憶幼時侍養勿能如祇今
悔難追把卷情欷歔更慚日荒落雅志慕前軌佇望君雲
仍克纘先人美

又

錢維喬

數椽茅屋起晨炊中有慈烏反哺遲五鼎三牲應不少爭
如栝圈及生時

考叔遺羹稱至孝陸郎懷橘號奇童豈知每飯縈冰蘖更有含饑出苦衷

漫將脩短問穹蒼至行全時與世長爲語學人休遠覓知親餒處是天良

永慕天教士克端顯揚最是令名難此圖能使人心感定有華堂忍淚看

又

蘇 淳

菽水承歡古有之似君顧養更堪悲兒饑那比孀饑切枵腹連朝人不知

反哺含靈具有情如何末俗視為輕懸圖留作兒孫樣慈
孝繩繩續令名

又

雜

昔華堂

天蒼土哀敬懸掛景合

殊贈景天頁

懸津滸

亦含贈出苦衷

善賦數

莢庵公列縣志孝友傳

十四世

屠選公爲人渾樸誠厚父子俊暮齡好樗蒲戲然性質直無機械戲輒負又患肝疾選公則恒以多金資父執請偕父遊博而佯負焉父疾以是愈

莢庵公孝行載桑梓潛德錄

屠選公武進德澤鄉人爲人渾厚誠樸事父子俊至孝晨昏定省愉色婉容父好樗蒲戲然性質直無機械戲輒負日或十餘金選公償所負不越宿也公病肝選公請父執數人遊吳山陰以多金資父執請與父博而佯負焉以悅

父心疾以是愈數年父復病選公嘗糞以辨瘥劇父歿有持金償其父者辭弗受曰吾父生平無簿籍不敢受弟亦好博終身不斥一語但見博歸必正色接之弟悟遂悔改選公生平未嘗言人過時與木商貿易凡族之開廠者負多金必歸選公行以其能不索所負也時有屠春元者選公族也事繼母以孝聞家貧創業其厚待族人不異選公族人負之者幾萬金終身弗校也

春元譜作春園

菴庵公傳

十四世

彌甥蘇鳳藻拜謨

屠菴庵先生諱銓字選公一字菴庵父子俊公鄉飲大賓
生子二先生其長也孝友根於天性幼能承歡膝下比長
行益篤屠氏世業賈父持握甚勞先生見父精力漸衰遂
以身自任出入井井且臨財毋苟與人必忠朋自遠來者
日眾由是子俊公能優游家居當晝長宵永常偕二三老
友假手談以消遣性質直無機械負輒多金先生虞父惜
貲懊悶負卽代償不越宿也子俊公患肝病先生具舟邀
父執數人同遊吳山陰以多金資父執乞佯負焉以悅其

意不浹旬而疾果愈後數年父復病先生顙天泣禱願以身代相傳先生於侍疾時每嘗糞以辨瘥劇事母先意承志一如事父與弟咸舒友愛篤摯溫清定省必帥與俱故咸舒亦能志兄之志承順無違望子姪讀書心切擇師必經明行修之士待之至忠且敬性寬厚生平未嘗言人過失族中同業貧乏不能自存者負先生金先生不索所負多陰恤之有持金來償者先生婉卻之曰吾父簿帳未載奚敢受也其思貽必果如此先生生於康熙五十年乾隆四十一年卒春秋六十有五

論曰啞啞笑呱呱泣人子少時惟父母是慕先生事親以
悅親爲志求不失赤子初心而已安知身後名哉及今先
生之孝行邑志載之桑梓潛德錄載之先生必有愀然不
安者而先生之父怡然矣

春園公傳

廣川公附

十四世十五世

同里李文詰撰

君姓屠氏諱恭太學生字馥盛春園其號也世居常郡之北郭父方泰生子二長卽君次秀盛家素饒從伯宏叙愛君孝友重然諾以君爲嗣子君盡讓家財與弟挾計然之策權子母度緩急不數年遽獲贏餘繼母王孺人好施與以緡錢置牀頭甫盡又置之積久無間服用膳羞必度所喜而後進常侍側不命不敢退親偶疾手治湯藥衣不解帶非益友不交族宗武選公並以孝行著君友愛肫摯視如親昆弟常曰人當爲天下所不可少之人次爲郡邑所

不可少之人次爲鄉黨所不可少之人次爲一家所不可
少之人下此則不足算矣常以利人之事爲念有窘急者
慨助之使讀書或治生業各贖其意以去間有負之者置
不較乾隆四十四年 翠華臨幸常州駐蹕之所凡用木
植費以萬計君踴躍置備經度得宜旌門榷榷每事如式
郡守成公以爲能手書言坊行表扁額彰其廳事竊嘗論
之言者心之聲贈人以言暖于布帛傷人以言深于矛戟
言可爲坊則其言必當矣行者德之符資于事父以事母
而愛同資于事父以事君而敬同行可爲表則其行必誠

矣成公賜之無溢辭君當之無愧色君生于康熙五十五年正月十二日乾隆四十七年五月初十日卒年六十七子五人次子廣川

廣川諱溶太學生出繼從叔父秉彝後性誠篤郡中創立敬節堂廣川首先倡捐與族父銘莪協理其事遂定迄今賴之惠于嫗孀是之謂乎

南帆公列縣志孝友傳

譜諱薰

十四世

屠宗武懷北鄉人父歿與弟南耕養母母疽發於腦醫者

謝勿治宗武割股肉和湯進之愈

志誤作懷南

南帆公孝行載桑梓潛德錄

屠宗武武進縣北郭人少穎悟讀書知大義父歿與弟南耕養母無間言歲戊寅宗武患痢不能起時母年七十五矣忽疽發於腦頭面盡腫沉痛不省人事南耕泣曰兒疾殆矣脫聞母病是益其疾也誠家人毋得洩覓參苓治之越日母病益甚醫者謝去宗武睡中忽躍起謂婦曰吾母

有恙耶何不言當扶我往視湯藥宗武至母已不受飲氣奄奄將絕矣宗武拔佩刀割股肉和湯進之母下咽者三
是夜五更子婦環侍聞母枕邊若有聲注視得藥圓長四寸厚一分色黑氣芬芳襲人嘗之味辛眾駭不知所自徐問母母曰我頃飲藥頸上覺清凉吾可生矣命以粥湯進次日精神頓起越三日而瘳宗武自入母室病亦霍然愈咸謂誠孝所感云

紀屠宗武孝行

十四世

李瑞岡撰

屠宗武余同學友也父諱喬齡母周氏舉子五人伯仲早
世武以中子行長其次曰宗聖曰宗亮少穎敏讀書曉大
義愛閱史談古人忠孝事輒慷慨擊節如親見其行比長
恂謹守家法雖處闖闖每閉戶吟咏父沒與弟同養母潔
膳羞積久無間歲戊寅三月武病且篤自去秋患痢至是
益劇奄奄一息蓋瀕死者屢矣而是時母年七十有五疾
大作發腦疽一夕頭面盡腫沉痛不省人事兩弟泣謂曰
兄方危告知必不起且愈傷母心姑緩言而急辦參苓庶

可治丹陽蔣生者良醫也用薰托法勢略退越夕中腕忽痛飲食嘔吐汗如雨醫者束手謝去時武卧床席忽蹶起謂婦曰吾母無恙耶吾無病當扶我往視湯藥武至則母氣將絕不受飲矣拔小刀割股和湯以進母啟齒下咽者三是夜漏盡天色明昧室中燈光黯黯子媳環侍聞枕邊簌簌若有聲注視則黑末圓廣四寸許厚一分氣芬芳味辣舉家驚愕徐啟問母母曰頃藥我項上甚清涼吾得生矣命媳以粥進盡半盂次日精神頓起醫者盡法調治凡去潰敗膿血十數碗肉落如掌經三月而疽口復合武自

侍居母室未嘗頃刻離湯藥親嘗衣不解帶不復自知其病而病已霍然眾謂誠孝所格云余與武爲總角交其尊人又余父執友憶癸酉入都余登堂拜其母及今旋里里人嘖嘖稱賢其季聖亮又爲余述其顛末孔子曰孝哉閔子騫人不問於其父母昆弟之言藉非實行積中何以名傳於外耶夫天人感應厯厯不爽至孝格天足以延親年而愈親疾其事至神而其理至近余故樂書之以告世之爲人子者

璞山公列縣志孝友傳

十四世

屠南琛字士璋生四歲孤母萬氏撫教有法既長好學言
動必謹與同邑蘇淳畢應箕蔡謙光講學力行事母至孝
母歿晨昏必呼其母如生時乾隆五十五年郡人議設敬
節會南琛營其事甚力首建義塾爲四郊倡宗祠祭產薄
割田益之又於祠旁建孝子節婦祠以彰前烈皆體其母
意爲之也嘉慶丁卯甲戌頻旱饑賑貸不給議積穀爲預
備計人多難之南琛毅然身任集貲舉行於所居子城廂
二圖倡爲積穀會後同邑盛侍御惇大聞之入奏得

旨飭令各直省通行實南琛開其先焉著語錄數卷藏於家子汝寬廩膳生謙謹有家法畢應箕字耀寰本吳氏中表畢撫爲後以孝聞嗜許文正遺書薛文正讀書錄謂繼朱子者二公爲得其正志欲少置田宅爲畢氏立後而身歸本宗竟不克臨歿戒其子善承畢氏後而葬已於本生父之墓旁蔡謙光字師澤郡增生少孤有至性再舉孝廉方正並力辭不喜著述惟多錄先正格言以示學者

璞山公傳

宜興吳德旋謨

君姓屠氏諱南琛字銘莪一字士璋璞山其自號也生四

歲而孤賴母萬太孺人撫教之得成立既長自知好學言
動必謹與同邑蘇謹人畢雨亭王省吾及予族父晉望先
生講求宋大儒書以身體而力行之事母尤盡孝承意旨
無違家故饒裕然性喜節儉惟於施也侈焉乾隆庚戌年
郡人議設敬節會君營其事甚力而首建義塾爲四郊倡
宗祠祭產薄不甚給供祀事君捐己田二十畝益之又於
祠旁建孝子節婦二祠以彰前烈皆體其母孺人意而爲
之也遇歲凶歉輒出錢糴穀以賑至其晚歲幾困矣然猶
行諸善事不怠道光八年正月得疾卒年六十有六所著

鶴渚公行述

十五世

府君諱雲號鶴渚先大父生子四三卽府君也生而穎異
六歲就塾讀書數行俱下九歲學爲制舉文屢出驚人語
時受業驥江陸一清先生謂先大父曰此君家千里駒也
十二歲先大母沈孺人遘疾府君躬侍湯藥刻不廢離比
謝世號痛幾絕先大父續娶徐孺人府君曲盡子道能得
繼母歡十五應童子試輒前列十八吾母管孺人來歸二
十三歲補博士弟子員二十四歲春先大父有疾以家事
付府君是冬先大父疾篤府君竭力療治不解帶者四十

餘日正歲遭喪哀毀骨立服闋而家計益叢府君喟然曰
吾生平讀書之志於是已矣庶幾望之子孫耳故自_其等
甫離孩抱卽不惜厚脯敦請名師始延莊注軒先生閱二
年先生應京兆試卽延先生弟莊蔚華先生先生口講指
畫無須臾間府君探知先生有家計憂卽潛遣人饋致之
仍敬奉脩脯如數先生固却府君意益堅必如所請乃已
丙子秋先生染時癘遽卒府君奔哭極哀經紀其喪明年
延蘇景淳先生先生學邃品醇府君遇事輒虛懷諮訪嘗
語吾母曰蘇師非獨兒輩師乃吾師也府君喜聚書共數

十百種每與蘇師論經史疑義一燈熒熒恒至夜分不倦
先生執友數人府君時延致之供饌必精腆遠者信宿乃
去或謂府君曰君奉蘇師殆於所愛亦愛所敬亦敬矣府
君曰固也吾誠以事親之道事師耳辛卯管松崖太史讀
禮家居延珂往課表弟兆金府君曰汝固非能爲人師者
顧舅氏學問人品眾所推仰汝爲師而適得良師是可喜
也迨舅氏服闋赴職遂命珂隨從入都臨行戒之曰科名
得失自有定數一切馳騫奔競之習斷不可爲做人處事
悉以舅氏爲法甲午珂獲雋北闈乙未捷南宮而琪亦以

是年入郡庠府君曰吾德薄能鮮汝兄弟材質庸魯何以致是是皆祖宗積累及先生教育之力也汝等當不忘所

自珂

殿試忝列二甲

朝考復擢取第七名一時諸先達謬許可膺館選而歸知縣班需次繼相國于公奉

旨揀取朝考卷內字畫楷整可入武英殿繕寫書籤者共十六人珂名在第四而聞信前一日已束裝出都比歸意頗快快府君曰吾鄉高才碩學久躋場屋者不知凡幾汝

赴京三載遽獲科甲以歸尙以爲未足耶適鹺使楊公具書幣聘教其子府君曰淮揚一水鼓棹往來易耳庭除之間自有兄在汝毋戀戀爲珂承命拜別以行嗚呼孰知自是遂不復聆府君之訓誨耶府君爲人重氣誼厚倫理先伯父澹齋公自幼出繼府君友愛尤摯事無大小諮而後行二伯父兩娶伯母未有子府君以長兄琛爲之後女五人均擇名門字之伯母旣亡府君卽力請伯父同爨財用出入悉委兄琛謂曰吾與仲兄無分彼此汝兄弟亦不必更分彼此也先叔父分析後屢有虧累府君輒代償給身

後事備爲經紀焉府君姊妹三人長姑適湯氏姑壻早世家貧府君迎歸奉養撫二甥如己子次姑適孟氏三姑適汪氏三姑不得所天府君并其所生女迎歸先外大父管來茲先生遺一孫漂流無託府君曰吾不可使外舅無後亟收育之同宗百有餘家聚居青山門外府君遇事並爲盡力擇聰慧可讀書者誘掖成之與人交誠信坦露始終不渝而士人則尤所愛重吳江余某冒他縣籍院取後旋被斥革因株累不已歲暮潛避來常府君延至家客之無德色後薦鄉宦某家授徒三載學業益進歸應試卒被知

遇其樂成人美類如此府君生康熙五十六年四月二十
五日子時乾隆四十一年八月初二日酉時卒年六十

男

琪珂述

外舅聞臺屠先生家傳

十五世

受業子壻黃懷孝敬謨

懷孝

年十三奉先君子遺命受業外舅聞臺屠先生之門

時孝

蒙未有知然竊見先生之事其本生父芷山府君與

妣汪孺人者而歎先生非近世之人蓋古之人也後七年

居甥館爲贅壻乃益知先生之深先生樸外惠中驟接之

若恂幅無華及觀其所措施無不粲然有文理自先生歿

而吾里中前輩衣冠警欵不可復見矣數年來屢欲爲先

生作傳念無以重先生下筆而中輟者再今次君慶善方

與郡邑志事屬

孝

略述先生梗概以備載筆者之采擇

孝

雖賤其安敢辭按先生姓屠氏諱馨字聞臺世居城北青
山里 國初遷觀子巷與吾家比屋而居累世潛德未耀
至先生本生父芷山府君諱瑤始以書名先生少攻舉子
業從管先生壽筭遊故宿儒也在門下稱高弟子及壯授
經里中方嚴有師法既乃謀甘旨客遊粵東大吏爭延誨
其子弟中歲後以親老謝歸 孝 受業先生時芷山府君與
汪孺人猶健在先生愉愉色養先意承志曲得歡心與 孝
妻本生父佩荃翁出入必偕友愛如童子及芷山府君歿
汪孺人益衰老先生年七十矣凡孺人飲食居處下及廁

膾穢褻之事無不一一躬親之人欲代其勞先生曰吾母
豈汝輩所能事者卒勿許也汪孺人沒先生哭盡哀或引
古禮止之先生曰父母之喪如天傾地陷此何等事而借
禮以自恕耶其至性類如此若其他懿行不勝書亦非先
生所重也故不及先生生於乾隆十八年十月廿五日卒
於道光十七年四月初十日享年八十五歲配吳氏子男
二人慶瀾慶善孫男七人曾孫七人女一以弟佩荃第三
女爲女懷孝妻也

子壻黃懷孝曰余聞汪孺人云先生少隨嗣母周孺人起

居周沒時先生齒尚幼侍疾維謹湯藥非親嘗不敢進既
沒哀毀盡禮終身思慕不忘蓋非獨篤於所生已也而孝
之備蒙訓誨憐其孤露而多方愛護之尤有令人不能忘
者九京可作非先生吾誰與歸耶

宏聲公傳

十五世

陸慶頤撰

慶頤自咸豐甲寅夏始識屠君潤芝旋與定交得見其封翁楚琇先生今歲先生年八十諸子謀壽其親先生勿許毅然以續修屠氏族譜爲己任局設於所居之東頻邀慶頤過其家一日封翁出執慶頤手而言曰惟聰後從叔再榮府君兼祧正榮府君而本生父爲宏聲府君生子五人惟善惟尊惟明先妣氏周出吾母氏吳生惟馨季卽惟聰乾隆五十一年大疫痛吾父以五月十八日卒甫踰月吾母相繼下世時惟聰年十一疊遭大喪呼天搶地哀號莫

及茲得纂修家乘皆仰賴先人遺蔭乞爲府君立傳敢重
勞吾子惟府君嘉言懿行惟聰童稚昏迷茫無知識最痛
者今處華屋而府君所居僅蔽風雨今飫常珍而府君所
食半皆粗糲維聰行年八十步履尙健而府君年僅五十
有四諺云身從何來生我之恩奚忍忘也言及此不禁歛
歔泣下時諸子環侍勸慰久之慶頤歸謹卽先生孺慕之
誠哀思之切爲宏聲府君傳府君諱廣聞宏聲其字也

再榮正榮兩公合傳

十五世

陸慶頤撰

楚琇封翁讀宏聲府君傳而歎歎久之并請讓嗣父兄弟合傳按屠氏世系表聖揆府君有子二人長曰再榮府君次曰正榮府君再榮固冢子而承父祀者也無子撫從兄宏聲府君季子維聰再榮弟正榮不娶維聰兼祧溯宏聲府君卒於乾隆五十一年越三年而再榮卒嗣子年十三矣雖稍長於居木生父憂時其不能稔再榮府君之嘉言懿行與不能稔宏聲府君無異正榮少再榮三歲以嘉慶十七年卒距再榮卒時已閱二十有五年則維聰之事正

榮府君爲時最久有子六人以潤芝爲正榮鍾愛分承正榮府君祀潤芝嘗與慶頤言府君性孤介好潔潤芝七齡隨侍不命食不敢食也然信義素著遐邇欽服吾父紹承先業家由是興慶頤綜核兩公生平再榮年未五十而卒并莫詳其性情行誼而能得令子爲子及其弟皆享祀勿替今子姓蕃衍家門雍睦知兩公積累於獨知之地者深矣

楚琇先生八十壽序

咸豐四年冬十月北郭屠君潤芝以尊甫楚琇先生明年
秋仲八十壽辰先期謀有以壽其親者詢以曩歲稱觴何
若潤芝語慶頤曰吾父少困貧乏備嘗險阻渡江涉淮罔
獲安處年五十客金陵年六十寓真州俱未稱祝年七十
始家居不復出遊嘗於東郊禪寺建水陸大醮復捐田於
寺每屆誕日誦佛延壽歲以爲常今將何以壽吾親乎慶
頤竊謂介壽莫大於修善修善莫切於行仁仁者天地之
生氣萬物之生機人得天地生生之氣以爲心遂其生以

尊其生者也吾常養老育嬰諸善靡不備舉惟江陰創建恤孤義塾專爲節婦之子讀書之地郡城尙未及行能捐資倡建恤孤兒讀書慰母之心成節婦望子克家之願他日重修邑乘特書郡城有恤孤義塾自屠氏始則所以壽其親者其庶幾乎潤芝歸謀之羣弟白諸堂上先生欣然曰是必當行而行之有序我屠氏族譜未修已五十餘年矣當吾世如再因循歲月愈久采訪益難然計丁出泉恐貧者無以應命開支公歛恐春秋無以供祭敬謝族人獨解囊橐潤芝偕弟順承親志開局纂修思桑梓敬恭之義

葛藟本根之底孰先孰後重愧予言之多躁益服施行當有序也越數日潤芝出示徵壽言啟時寇氛未埽金陵鎮江尙未克復郡城坊廂團練圖勇合操於南郊演武場十一月八日制軍大閱奔走從事未遑應也是日得雪詰朝晴霽雪牕展讀敬謠先生幼稟至性善事所生以從叔正榮再榮兩府君乏嗣一人兼祧雖後叔父與德配姚太宜人仍居本生父宏聲府君分授舊廬仰事俯育艱於治生忍饑耐寒勇以持志而正榮府君性方嚴寡言笑年老多病稍不當意悒悒不樂潤芝年甫七齡朝夕侍側大父之

厚且良陶三言
歡能承嗣子之愛彌篤先生迎歸具甘旨奉湯藥葬祭盡
禮無異所生正榮府君雖家鮮蓋藏而人欽信義先生承
茲舊業益以樸誠門祚由是益振生平崇節儉戒浮華粒
米寸絲罔不愛惜然樂善不倦見義必爲宗祠恒產無多
每集資以祭先生倡捐多金設立祭產蘋蘩告虔享祀豐
潔北直河道日久淤淺命潤芝從鄉先生後勤謹襄事開
濬深通行者利涉孫達齋邑侯書利濟梓鄉額爲贈西半
圖地形低下每遇大水田廬淹沒道光癸未庚子辛丑己
酉庚戌五遇水災先生慨念發賑需時民饑奚食於夏間

創議日購麻糕蒸餅船載散給同志踵行罄鴻以活舊春
議濬城濠各圖舉董分理二月下旬警報日聞居民遷徙
先生命潤芝處以鎮定竟日河干勉勵役夫故北濠啟壩
獨後他處吳君旭仲曾爲予述斯事予聞而壯之今夏四
月郡尊顯侯世公欽慕先生行誼鄉里稱善人教子孫有
法度造廬請見書美意延年額以祝先生謙冲如畏滿盈
知懼欲然悚然長君急人患難年不副德仲叔兩君綜理
庶務泛應曲當操勞家事一秉至公文孫爲本英年好善
仁勇兼備善書能文持其餘事爲本培芝子也先生初以

培芝候銓理問 封如其官旋以加級請 封晉階奉直
大夫夫簪黻之榮奚關性分琴酒之養佐以林泉家有小
園門題挹爽先生誕辰時維八月銀蟾皎潔叢桂盛開舉
家上壽宴賓於園尊酒團圞促坐權笑致足樂也矧兄弟
濟美後昆多賢凡百善舉暢所欲爲愛憐嬌兒倏報生孫
賢明筵室亦膺 封典享大年受多福天祐仁人詎可量
哉今者一陽來復雪瑞占豐四海永青春和布德

聖人宵旰憂勞於上臣民恐懼修省於下孝子順孫和氣
致祥嘉澍時暘疾害不作干羽兩階凱歌一曲先生其聞

而怡然飲玉乎仲冬下澣陸慶頤撰

此文例應俟下次續修載入緣楚琇賢姪孫行年八十
修家乘廣祭產創建恤孤家塾其尊祖敬宗敦本睦族
之心孳孳不倦特將八十壽文登入願其百歲康強九
旬百齡壽言一律續登膺受多福族叔祖應詮書

煥亭公傳

十六世

弟琪謨

公諱珩字藜照號煥亭先伯父澹齋公子澹齋公生子三
長卽公公天性忱摯笑言不苟自總角時已有老成風度
坐書塾中值師外出羣兄弟或交相嬉戲公獨端莊靜坐
如對大賓澹齋公器異之嘗謂此子聰明才辨似不及乃
弟然沈靜寡言他日必有成就以故將家事付兩弟而獨
令公專志讀書公承父志習舉子業寒暑無間每當丙夜
燈火熒熒兀坐吟誦輒以爲常年二十六補博士弟子員
學業益進每科歲試俱列高等旋以冠軍食餼而時運偃

蹇十赴棘闈不第識者俱爲公抱屈而公氣益平學益粹
卒無幾微怨尤之色見於言面大約公之文章宗法有明
諸大家氣局宏敞而於理題尤勝六經諸子研精極思旁
及星學醫學無所不窺每不輕爲人道偶出一語無不奇
中尤工臨池縱橫跌宕深得晉唐人筆意遠近請書者踵
相接公對客揮毫娓娓不倦澹齋公故深於書蓋不獨天
分過人亦家學淵源有自來也公事澹齋公先意承志細
微不至無不周到澹齋公晚年優游靜養鑪香茗椀名帖
古畫積案盈箱公侍左右未嘗一日暫離澹齋公歿後事

母卜太孺人尤謹每有小恙公輒移榻就寢終夜十數起
卜太孺人後澹齋公五年而歿公兄弟分爨家事仍付二
弟經理承父命也公故無祖遺恒產惟筆耕舌織爲業嘗
語人曰貧乃士之常惟患修名不立耳公爲人敦氣謹重
倫理與人交誠信坦豁始終不渝聲色貨利一無所嗜晚
年鍾情於名山勝水嘗與同人遊杭州凡天竺靈巖雲棲
石屋洞諸勝暨岳墓于墳諸古蹟靡不畢覽有紀遊詩一
卷近又擬有黃山白嶽之遊未果而卒年五十九
論曰煥亭公生平頗多可採顧世俗所謂難能而可貴者

皆吾儒分內之事無可傳者余故略而不論第述其學問
人品如此余少公六歲公嘗謬以知音相許去秋屬余剛
定文稿未果今乃爲公作傳於戲可慨也夫

年親時與許山陰水書與同人並許出夫然靈氣與對
自其夫人女孫而後故識與余無異一清濁與
如人口持以士之當辨也各不立其公與人與其重
自其孰與余自其不與也與余無異一清濁與
不其誰人何與也及正乎而與余自其與余無異一
自其孰與余自其不與也與余無異一清濁與

丹崖公行述

十六世

府君諱琪字樹洲號丹崖大父鶴渚公生子三長伯父峴
亭公次府君季叔父韞齋公府君秉性純厚幼偕蘊齋公
從師肄業以弟天分尤敏府君刻苦倍之無間寒暑致攪
痰疾年二十九始獲一衿旋即食餼遭大父母憂哀毀幾
不欲生三年未嘗見齒府君循循善誘親友競就請業歷
試秋闈屢薦不售丙午韞齋公令山西五臺大母管太安
人迎養任所庚戌府君以定省久違攜湘襪被西行臺邑
羣山綿亘勝境周環爲川翠華臨幸之所府君悉紀以詩

嗣以韞齋公移官閩省因案罷職心事紛如而湘等兄弟

姊妹婚嫁迭乘左支右絀遂得氣喘症後湘遊幕江鄉薄

得館穀佐菽水之奉長子有綸府君親自訓課次子有本

三子有章漸已長成府君常以繼續書香為念謂科名自

有命存而書不可一日不讀子弟讀書冀可變化氣質歲

庚午湘以末秩分發東河冀得升斗之祿以盡一日之養

壬申冬甫補汶上之開河聞而先妣劉孺人遽見背甲戌

仍束裝外遊府君依依以客居保重為諭不數月得府君

病篤之信驚魂四出星夜馳歸而已不及視含斂矣府君

不苟言笑不談人過持已以敬待戚友以誠勤儉尤根於
素性幼受業於蘇謹人先生府君年逾六旬每進見恂恂
如童時侍嚴父兄狀侍大母管太安人宛若孩提而太安
人亦忘其爲白頭子也與伯叔父怡怡友愛伯叔父或外
出遲歸甚至夜深必會晤始就寢於富貴利達視之淡如
棄養前兩月自書遺命十六條諄諄訓湘等以敦本睦族
爲重命喪事毋用浮靡著有丹崖詩草十卷讀詩管窺四
卷讀史聞風錄八卷藏於家

男湘述

丹崖公讀詩管窺序

附

詩者情也今人之情卽古人之情也以我之情度古人之情雖不中不遠矣余自束髮受書潛心集傳時覺有不安於心比長取小序及毛傳而彙叅之旁採先儒諸說并當代名人緒論間亦自附己意以求執厥中日月旣久遂成卷帙旣不敢刻舟而求劍亦不敢膠柱而鼓瑟偶有會意箋釋數言韓子云坐井而觀天曰天小者非天小也然小亦天也不可謂非有所見也余之於詩豈僅坐井觀天哉直以管窺天耳因名之曰讀詩管窺集成漫題數語於簡

首以管窺天耳因序之曰蕭林台窺巢與窺風遠窺鏡
 衣天出不可階非許泚見出余之效荷豈對坐我躡天鏡
 窺窺窺言韓子云坐我而躡天曰天小首非天小也然小
 谷知鴉不類椋椋重寒樓亦不類鸛其而鼓瑟則自會意
 外洋人辨鐘圖亦自謂曰意以水持瀾中日且鴉入教如
 列心出與如小乳及手幹而棄察之竟斜決謝箭箭共當
 漸漸不中不盡矣余自東邊受書習心棄物却習言不守
 詩書計也今人之計則古人之計也以非之計則古人之

韞齋公傳

十六世

陸慶頤撰

屠韞齋先生諱珂字鳴墀贈文林郎國欣公孫贈承德郎
鶴渚公子幼聰穎過日成誦十歲能文鶴渚公特愛之弱
冠補博士弟子員時舅氏管松崖先生居母憂延先生課
其子旋從松崖先生入都中式甲午科順天舉人乙未成
進士殿試二甲朝考前列一時諸先達期得館選而
卒歸知縣班候銓俄而大學士于公奉

旨揀取朝考卷字畫端整可入武英殿繕寫書籤者
凡十六人先生名在第四而聞信前一日已束裝出都同

身日具陔文訓 卷四
人咸爲惋惜而先生絕不介意曰他日出宰方隅能得上
不負 朝廷下不負民生吾願畢矣後宰五臺鶴渚公已
卽世祿不逮養言輒流涕迎養管太安人事悉咨稟焉居
縣六年誠奉母訓恪守官箴革蠹胥除苛政勸農桑興教
化獄求得情案無留牘恭遇

高宗純皇帝西巡

駕幸五臺山大差無誤以勞升福建延平府上洋通判所
涖皆潔已愛民不肯剝民財以自奉并不肯剝民財以趨
附上官嘗曰吏者 朝廷所設非上官所設也腴民脂膏

以求媚我則安能後調馬家港撫民通判竟以忤上官罷
嘉慶十三年七月卒於青山里第春秋六十有三配王安
人同邑羽階上舍女善事舅姑自奉儉約享年八十有九
子慕曾

陸慶頤曰予四姑適屠童時常隨大母往姑家卽聞先生
名未從先生遊也比長遊京師獲交同邑劉君遵軾常語
保韜庵先生之賢求韜庵遺書而不可得今遵軾檢韞齋
先生行狀屬爲詮次聞先生以不忍剝下媚上罷官其不
得罪百姓可知矣

韞齋公時文序

附

時文爲士子進身之羔雁使必太羹元酒以爲高是無羔雁也使必時花美女以爲豔是僞羔雁也無羔雁則無以爲進身之階僞羔雁則無以端進身之本韞齋之文格韻極高理脉極細却又非太羹元酒聲調極響詞華極茂却又非時花美女大抵原本六經叅之左國史漢唐宋八家至其清和朗潤溫麗綿密則又自成其爲一家之言儲六雅云凡應制文取亮而不取闇取摯而不取野取華而不取寒取動而不取定韞齋之文可謂亮矣華矣抑可謂摯

矣動矣其投之所向無不如意取巍科如拾芥也亦固其所雖然韞齋之文寬厚宏博洵足鼓吹風雅黼黻休明宜若一生富貴福澤必有大過人者顧其福不稱其文通籍後在晉六年在閩二年卽匆匆棄職旋里家居仍以教授爲業得大肆力于學問文章正嘉之渾冝隆萬之縝密天崇之宏肆無不兼而有之其識愈高其理愈邃其才愈斂其氣愈昌視少所作又高出數倍向使韞齋仕途顯達得展其平生抱負雖其政事文章未必不傳于後而要不能所造精深一至於是然天之所以嗇其遇者正未必非天

之所以私韞齋厚韞齋而使其文必傳於後也韞齋晚年自訂其文一百二十餘篇近作存十之六七少作不過存十之二三韞齋捐館後猶子慕曾擬以剞劂而力有未逮因請蘇健之錫之二先生酌選六十餘篇先以付梓二編續出韞齋之在尊聞書院時也余嘗寄以詩云杜家篇什愁中富蘇氏文章海外傳與汝應須各努力千秋盛業在林泉韞齋可謂不負斯語矣余喜韞齋之文得以問世也於是乎書

屠君雲標暨袁孺人合傳

十六世

謝應芝撰

君姓屠氏諱雲標武進人屠氏故鉅族迄君中落家不戒於火居處衣食之費幾無所出君竭蹶經營然未嘗妄取非義旣而貲業稍裕存心利物歲終索逋負輒計貧苦家焚其券諸子請曰某某非極窘庶索之以資我用乎君曰取此區區者於我非能有濟度彼將無以卒歲奚忍哉卒置不問嗚呼緩急人所時有彼精於心計者知有已而不知有人視此可以愧矣道光乙未卒年五十有三配袁氏相夫勤家常取給於十指或饋之却不受時時取內則及

朱柏廬家訓為諸子講解晚歲教孫曾猶然年七十有三
 卒於咸豐乙卯子五人孫十三人曾孫一人
 謝應芝曰甚哉貧富之際為難處也貧而求富未必遂富
 及富而忘人之貧雖多取終亦未必不貧也如屠君有足
 多矣蓋亦內助之賢相與有成歟子孫體此則家道之隆
 豈有暨哉

屠氏昆陵文譜

十六

謝應芝

潤培公傳

十六世

傅成霖謹識

公諱潤培官印清溪號雪齋性謹厚遇事有謀幹溷跡市
廛而頗有雅人深致故騷人墨客樂與游焉庚申之變避
亂歷艱苦迨城復乃歸家毀於兵燹幸公有三子次樺榮
精於服賈客多服其信義爭與之交不數年家日起倍徙
於曩昔公雖饒於資而自奉薄孫曾林立惟延師訓讀修
必厚孫光孚補縣學生具有栽培之力七十壽欲節壽筵
費以修築橋梁故通濟橋修葺一新公創捐之力也年八
十適顧霞軒明經倡鄉耆會董蓉初洗馬李信甫學博汪

菽民刺史湯確園司馬劉恂之孝廉諸名公約共十有七
人為雅集團公與其會並載有七律詩兩首士林稱之嗚
呼公真年高德邵足以佑啟後人者乎今屠氏續修家乘
用撰數語以誌景仰云

諸公雅集圖
論思黜書童對席
風雨散會聚人
公端聞報官
斷辭公辭

印泉玉樹兩公合傳

十六世

外孫周仁撰謹譔

公姓屠氏諱文彬字印泉祖諱宗武字南藩以孝行聞於鄉里父諱洽字驥雲生子一卽公也自先世遷常州青山門外聚族而居者已數世公性篤謹不苟言笑雖寄跡市廛絕無陋習後生小子皆以嚴見憚而與人接物則又藹然可親常勉人以善不苛小節臧獲輩亦頌其仁慈焉其從事也勤而懇必求其安而後止爲人謀雖力有所不逮亦委曲勉赴不憚煩不辭勞有嘲之者則曰一息尙存不容稍懈天下事詎可畏難而趨易耶噫公之言可以訓矣

家門以內雍如穆如公生於嘉慶六年八月二十一日卒於咸豐四年七月初八日配楊氏生子二芝英芝泰芝英國學生候選府經歷芝泰候選鹽大使公以子官例得七品封女二我母其長也芝泰爲公之堂弟文階兼祧子文階字玉樹咸豐乙卯屠氏續修宗譜與有勞焉玉樹崇儒業不屑屑於章句之學澹於科第授徒於鄉常以師道自任曰師嚴道尊嚴與尊教之所以立今世道已衰欲得良子弟而不尊其師饋脯則薄而督課則嚴非示子弟尊師重道之意欲求良子弟不可得也故執經受業者咸誠服

焉性好飲而遇事則敏捷爲之不爲酒累其立行之高如此其生也後印泉公三年卒也後印泉公六年馳贈如嗣子例女一適孟河楊

贊曰世風不古爲師而賈世道之治賈人亦師兄弟競爽如此一堂模符型合子孫其昌

崧少公傳

十七世

陸慶頤撰

屠君諱慕曾字春沂號崧少幼醇謹寡言笑長而隨父韞齋先生官山西襄理庶事有條不紊人咸謂君有從政才以艱於應試援例籤發安徽補懷遠縣主簿調鳳靈縣主簿升涇太縣丞事無巨細心精體察得上官器重厯署和州無爲州州同鳳陽天長縣知縣興利除弊有政聲會丁母憂已年逾六十絕意進取居家力償韞齋先生積逋親族貧乏者多所俛助後因金陵方氏與君至戚延理家事君配管孺人國學諱金麟公女温恭淑慎與君偕行君以

道光三十年九月初七日卒年六十有九管孺人前卒年六十有四合葬金陵新阡子嗣香河南候補縣尉世宗事論曰中庸言在下位不獲乎上民不可得而治矣獲上誠要哉君之父韞齋先生以忤上官罷君固優於才屢攝繁劇能獲乎上矣乃為簿為丞并不得真為令何哉

以顯於憲始封國建縣定縣縣對靈淵主縣時鳳靈淵主德夫圭官山西襄陽縣事官勤不棄人如聞者皆道其德淵言韞慕會宅春飛謝蘇少世謂淵寡言笑其面黜父賸

子百八

韞齋

子垣公行述

十七世

先大父諱湘字子垣瀟雨其別號也幼爲會祖丹厓公所
鍾愛郡縣試屢前列刻志攻苦晝夜無間年二十四先大
母姜太宜人來歸以家計窘迫客淮徐松太州郡得脩脯
以奉甘旨歲終歸省謂姜太宜人曰緩急所時有室中空
乏願毋令老人知太宜人奉命惟謹庚午得友人陳曼生
司馬汪己山員外徐月樵方伯之助遵例報捐分發東河
冀得升斗以養壬申冬甫補汶上閱家書知曾祖母劉太
宜人體稍不安遽請假還已先期棄養哀毀幾不欲生甲

成仍客清江不數月忽接曾祖考病篤之信星夜馳歸抵家而先兩刻闔棺矣慟哭曰二親謝世均以謀食之故不得親視含斂不可爲人不可爲子迄今言及之猶泣然流涕云先大父熟悉河防爲嚴小農粟樸園河帥所器重歷任河工主簿縣丞以勞績保薦奉日錄意河帥曾室中志旨歸入卓異班以沿河繁缺知縣補用上官廉先大父才檄署懷慶府孟縣下車後訪知縣吏有八總總各值一方凡一方以內之事皆歸總承辦奸宄恃爲奧援先大父嚴飭各總凡命案要犯久不得主名者勒限緝拏不數日按

名擒獲合邑咸頌神明旋攝溫縣溫爲盜賊淵藪尤稱難
治先大父抵任力行保甲之法晝夜巡防匪類無所潛踪
境內肅清其後厯署濟源原武等縣一如在溫孟時懷郡
各屬遇有疑獄一經先大父讞鞠立卽斷結在懷八年案
無留牘獄無冤民乙巳先大父因吾父患肝疾在常病故
宦興索然遂於丙午之秋解組歸里先叔父根巖公遠官
閩省補授甯化典史以臺郡匪徒騷擾瘴海馳驅在軍營
病歿荷蒙日補俸陳獻之二月二十四日亥時起坐身歿
恩旨贈銜賜廕卹典有加先大父接奉家報春府求大父

溫綸涕零感激諭^煒等勉圖上進毋墜家聲春初先大父
得痰喘疾日漸增劇痛於二月二十四日亥刻跌坐長逝
嗚呼傷已先大父歷仕數十年性極儉約齋中左圖右史
公餘惟事吟詠著有樂餘存草五卷樂餘贅語四卷瀟雨
樓詞鈔一卷善真行書興酣落筆淋漓盡致嘗作自箴隨
筆一編皆言修身齊家之道湯允叔司馬爲之序家居尤
澹泊不改儒素有以公事請託者則婉謝之言笑不苟不
妄取與常舉會祖遺命十六條以示^煒等曰此曾祖親自
書存以敦本睦族者汝曹志之勿忘先大父生於乾隆三

十九年九月三十日子時道光二十八年二月二十四日

亥時卒享年七十五

孫煒

謹述

子垣公七十壽文

朱材哲謨

當鞠紫蘭朱之節適協昌期考仙溪聖水之鄉尤多善治
鄭公三判民興望歲之思宋守初臨戶進長生之祝化洽
而嘉禾棲畝恩周而發粟盈倉大都溥惠蒸黎故爾垂光
弈禩稽古可證於今綦隆以名士而治名區已見同符於
異代況多壽而膺多福洵堪繼武於前賢也若我子垣太
翁先生詩豪書聖久播儒林治譜官箴夙承庭訓龔黃循
吏標駿望於金陵崔魏姻親締蟬嫣於錦里異稟髫鬣之
歲朗朗神清馳聲冠蓋之場槃槃才大游帷暫駐袖滿佳

篇宦轍偶經碑鐫德政凡諸不朽之盛業皆爲學道之明
徵可謂美意延年上善若谷者矣茲以季秋念九日爲先
生七十初度之辰材哲與先生仲嗣根巖少尹同官臺陽
衙鼓晨趨琴樽夜集習聞高矩備識芳型因得讀先生自
述詩八章浩氣彌綸雅音洋溢四百字之含宮嚼徵文至
情生數十年之作宦論交語長心重人咸謂禔躬集祐壽
世乃所以壽身而先生舉念皆春愛人尤深於愛已作書
誠根巖曰毋速客毋稱觴念仕路分馳音問常疎故里苟
仁漿可給宗親詎少寒門文休尙義而五黨含和晏子分

財而三族並壽先型具在予志斯存聞吉士之徽言尊如
彝鼎景耆英於洛社遠隔關河昔文潞公以是日誕生蘇
內翰代天子詔曰允爲廊廟之華豈獨閨門之慶往膺寵
數永錫壽祺夫官不論崇卑靖共者貴辭惟尙體要華藻
爲賓今者海上籌添弧南星燦若徒題鹿糕而介祉刻鳩
杖以綏齡未免廣撫卮言空宣瓦奏試爲縷指載頌黎眉
今夫東箭南金大材應無小用瑤林瓊樹天姿迴出人羣
其質瑰奇其光焜耀方欲登門而御李奚煩挾策以依劉
先生幼號神駒解參鳴鹿甘茂十二飛辯班生九歲摛文

韻協壘篋暖擁姜家之被基隆堂構香生謝氏之蘭向使
顏田可供豈惟趙書能讀乃楊震攜家涿郡食僅餐蔬胡
威拜父荊州歸惟質絹水一杯而作餞書半乘以言旋白
髮相莊青氈仍舊雖銖金寸錦不縈廉吏之高懷而夕膳
晨羞久蓄佳兒之隱願與其程功鐵硯遙儀鸛鷺之羣何
如脫穎錐囊早逮雞豚之養馳單車而入洛濡大筆以登
樓指玉儉爲主人約景差爲行侶璞蘊含章之美鍾留待
叩之音碧梧非凡鳥可棲紅藕之名花自笑爲羅以禮倒
屣相迎牙曠遭逢苔岑契合披郤而干牛立解振聲而萬

馬皆瘖議獄霜臺文闢秋荼之網論兵玉帳光添齊竈之
薪佐召虎以旬宣功高保障感馮蠡之疏導書續河渠條
析部分高掌遠躋有日出不窮之智具五官並用之能大
府依爲行厨百事欽其神算而先生坦然自得迨爾如忘
羔鴈充庭奉堂上兼珍之饌龍蛇滿幅寫窗前獨得之吟
下榻佳流傾襟國士或高燒樺燭平分梁苑之箋或遍灑
金壺頓貴剡溪之紙探梅鄧尉問柳蘇提瓊采花前簫聲
月夜皆足發揮翰墨點綴行裝迨至學古功深愛人心切
才恢游刃治試烹鮮拄手版以遙看齊煙九點盪胸襟於

一覽桃浪千尋鳥公辟處士於河陽先諮僚屬張邵入將
軍之幕府共仰丰裁使斯民戴節帥之成勞如神禹之明
德者皆先生之碩畫多方參謀靡懈者也由是績登上考
銜晉升階筍積簿書了了單言之判巢安枳棘徐徐六月
之飛偶栽柏以成陰或及瓜而受代澤深下尺樂繫去思
政成民和秫釀建康之酒官清訟簡牒求張旭之書訪宏
毅之故居表揚義士開公著之舊館尊禮賢人卽宦爲家
寄宅居然穎上愛公如父好春來自江南所以晚節彌亨
天倫至樂荆枝永茂儼競爽於河東槐葉常濃展新陰於

庭下季子初紆黃綬笙韻承顏童孫屬對金桃珠光繞膝
愛棠村而小住嘗蔗境以餘甘夏雨宏敷瑞湧丹砂之井
冬心獨抱題留黃絹之詞竹報頻聞菊香白領竝見 恩
榮疊錫乘熊軾以班春遙知士庶臚歡捧兕觥而作頌 材
哲蓬山舊住海嶠初來惟是芳躅傳聞常形歌詠況復朋
簪適盍亦有因緣喜送庚郵芬流子墨仰星輝於北斗裁
錦段於東瀛琴奏景風仙音繚繞筆垂秋露文采鮮明惟
祝上壽百年身比松柯而更健太行千仞顏如山色以俱
蒼

應義屠君傳

十七世

陸慶頤撰

君諱秉芝初名桂柱字應義幼明敏喜讀書以父勞於治
生爰棄而習賈當河運盛時常州運河爲江浙糧艘往來
孔道商運木自大江而下多客君家出鬻故運丁修造需
用木植詣君商度者踵相接其人愿者循謹畏法黠者橫
索州縣錦衣狐裘漿酒藿肉錢到手輒盡君以任俠聞陳
椽其間雖羯羴不均皆馴服由是利獲三倍無賈用弗售
之患然與之委蛇朝三暮四追隨跋涉半生精力多耗於
此五弟培芝爽直明決謂久必受累勸兄毅然弗與通君

亦倦遊勇於知止越數年豐北河決行海運君性慷慨急人之急爲人負累終無怨言生嘉慶丁巳咸豐四年閏七月卒年五十有八君與諸弟友愛培芝憫兄舊勞追念哀歎請 勲贈君奉直大夫原配吳宜人自幼歸於屠事舅姑如事父母舅姑視之如己女姑育幼子女宜人佐姑保抱提攜自襁褓以至就傅成人恩誼甚篤子祿椿

陸慶頤曰予素未識君與君仲氏潤芝遊聞喪往弔潤芝終日謝客有戚容無倦色踰年屬謨家傳述兄沒無私蓄有積逋父命取諸公悉償之嗚呼是亦可見君之大凡矣

洪堦公傳

十七世

傳成霖撰

君姓屠氏諱洪堦字爾誠議敘從九品候選縣佐祖諱燦
悅字怡園卽止雨節昔八主于明神宗曰
純皇帝南巡獨承辦木植大差而稱賞於大憲者也父諱
謙益字景和生子五長洪增次洪塏四洪修五洪琅君其
三也家素裕君將成童時家漸落竟至無力就傅讀書及
壯治生業至勤且儉性穎敏慷爽胸中無城府與世交接
又和易近人闡闡中主客往還鉅商多樂與之交故懋遷
日益盛積累日益豐境復充實有自來也父精武藝多搢

紳子弟從遊者君先意承旨周旋唯謹能得堂上歡母先
父二十年卒常以爲終天之恨其家徒壁立時雖瓶罍無
粒米不肯向親朋稱貸及家資稍充喜恤貧乏每當歲闌
訪有無能卒歲之家以洋銀餅投其門隙而不使人覺咸
豐間修祠宇竭力捐貲無少吝生平好施與敦宗睦族類
如此君初意不娶嘗云兄弟有子卽己子也迨長兄早卒
次兄遠出四五兩弟皆不生子卽幡然曰不孝有三無後
爲大遂娶薛墅卷吳孺人爲配同知銜廣東花縣知縣附
貢生諱崇政次女明年卽生子兆綸人皆謂好善之報時

咸豐九年也十年避兵芙蓉圩後又避靖江四墩子逃難時視財物爲敝屣而唯背負祖先遺像數軸而走復招親戚之無依者同居一處且將己所蓄與兩弟析爲三四弟持貲鬻販大爲折耗弟媳吳氏聞之大哭君好言相慰以爲傳言無據卽私自挾貲償弟失及歸無所損弟媳始釋然於前言在四墩子有傳聞景和公厝柩爲髮賊毀壞卽星夜偕弟洪修奔至墓所抱塚大哭出重賞招人修築不以常州滿地烽煙爲畏阻君之孝悌大概可見同治元年生次子兆平三年五月十八日疾終四墩子廬所正寢是

年

兆綸

六歲

兆平

三歲吳孺人三十六歲茹苦含辛撫育

二子至成人孺人性仁慈慷慨晚年處境稍艱尙解衣推

食鄉里稱以爲難歲癸卯屠氏修譜

兆綸

以其父爾誠君

事畧示予予嘉其優行多人所不能及而孝悌尤爲立品

之大綱是可以傳自其費計亦夫其誠無測其誠誠誠

論曰觀人於安常處順時不若觀人於厄難中之易得其

真也君之事蹟有可紀在庚申兵亂之後者居多予聞爾

誠君住四墩子二年餘恒坐譚茶肆見有南人貿然來者

傾囊相贈日以爲常此其軼事猶足動人而無論其大者

重者可以風當世也光緒廿九年癸卯暢月上澣

竹安公八十壽言

十七世名洪樹

史久華撰

溯自商山耆宿采芝草以調元渭水名賢釣玉璜而壽世
蓋有泰岱滄溟之量斯享遐齡具渾金璞玉之姿乃膺景
福厚德既積左券可操懿惟竹安老伯大人系出陳留秀
鍾姑幕藏書萬卷本蔡約李度之門散粟千鍾披范晏陰
德之傳子貢乃四科之選貨殖兼長河濟乃良木之儲侯
封是埒旣推博學並善治生祖德所貽清芬可誦已公生
而聰慧幼卽瑰奇學仲舒之下帷爲孫敬之閉戶優游文
圃寢饋藝林會以終子之年華思擷魯侯之芹藻刃及鋒

而將試璞以韞而必彰胡乃天厄其才人悲其遇蓼莪廢
讀王哀之涕常傾荆樹中摧少陵之憂靡已鯉庭風冷雁
序雲飛顧影自歎零丁隻手將支大厦家政待理先業誰
承於是舍東壁之圖書習西州之計算范蠡小隱乃學策
於計然樊重盛名亦治產於鄉里其勤也如巫馬戴星出
入其儉也若慶之不衣綺紈人靡親疎室懸故榻事無鉅
細胷藏智珠薦胡考之馨香柔盛必潔期先人之妥侑楹
榭重新派衍雲初復輯蘇家譜牒數稽歲入兼及范氏義
田豈期青犢橫行赤眉扇燄故鄉淪陷避亂倉皇崇祠半

燬於烽煙舊第盡生夫荆棘感深今昔劫歷滄桑泊乎
帝運中興寇氛淨掃公扁舟一葉梓里重歸鶚毀室而貽
憂鳳擇木而爰止居北通之廡下權作寓公集北之羣英
先營家廟釐正祠產規覈度支外表瀾清內含玉潤安貧
而簞瓢亦樂垂老而琴書自娛宜乎家有象賢謀詒燕翼
雖長君不祿主鬯已虛而次君松泉縣尉能讀父書夙承
庭訓慕乘風之宗懋志在四方效叱馭之王尊途經九折
塞外着其勞勩闕北錫以寵光恩答三春封崇五品
是則英英梓舍一鶚高騫又况濟濟桐孫三林挺秀通德

菊泉公七十壽言

十七世

姻愚姪劉可毅撰

余自漢口歸之十五日爲我菊泉先生七十之辰先
生爲余適屠女兄之從父余於先生輩行爲後且長余
年二十有六計自識先生垂垂三十年矣先生接人
甚謙謹然自出北門凡踰青山橋而東西而北且遠至瀕
江之地無少長皆知先生名行一不謹則唯恐先生
知畏先生過於官吏之撻辱而先生族尤大環北門
斗巷而家者無慮數十門戶皆氏屠皆先生族子若孫
而尤莫不親先生然則先生之能使途人畏族之人

親而先生之望之德乃可知已官吏寄威於筆朴寄魚
肉於胥役當夫高坐堂皇受百姓訴輿臺左右侍斥過者
蹠堂下甚或鞭背責自悔蹠者身受械楚無不痛且又退
則蹈前非不悔何也以勢脅之而非有望之感動之也聚
族而居高其垣墉嚴稽其色笑一不當意則以族人爲慢
且傲望風而卻走者十有八九以爲此官吏之臨民則然
非所以睦吾族則吾族亦無德之可親也獨於先生能
畏且親然則先生之望與德施之莅民而民服施之治
一國而一國以綏安在其服官之不爲循吏也而先生

顧伏處青山橋西遇風和氣清徐步谿側觀游魚之樂竹
樹之蒙密以爲快不屑之與官吏接而官吏聞 先生名
且樂造 先生居而 先生拒之淡如也然則 先生之
德之望尤不可及已余於漢口晤馮君曉青曉青與 先
生有連爲余言 先生年已七十當余初識 先生時余
方未壯今則髮已星星白齒且日落而 先生方聰強未
艾然則 先生之壽方與德望爲無涯而益昌大其子孫
也余將復有他適不可不一言以爲 先生壽光緒廿四
年戊戌正月下浣

樾榮公傳

十七世

傅成霖讓

公姓屠氏諱沛恩原名福榮樾榮其號也議叙五品銜

誥授奉直大夫考諱清溪以長孫光謙同知銜加級

誥封朝議大夫妣程恭人生三子長福慶次卽公三福祺
公穉年卽有特識見家况頗艱撐持非易旣無力讀書決
意就賈遂商借於親族之有力者暢理木業上下游往來
客商均服其信義而樂與之交不一年兄福慶逝世嫂蔣
恭人夙嫻婦道痛不欲生姪光謙生匝月正呱呱在抱之
時公譬慰百端哀思稍釋喪葬事事親理嗣後奉嫂撫姪

一室肅雍而雙親痛子之心亦稍慰公自幼以孝稱及長
凡事必求得親心歡遇親有疾病常卧不解帶不惟湯藥
親嘗一切粥糜菜蔬亦須親自烹調以進事無巨細決不
敢擅自主謀以爲堂上慮其內行之克盡孝弟有如此咸
豐二年粵賊猖熾風鶴皆驚郡城官紳招勇防堵並諭委
團練董事設局青山社而總董趙贊善伯厚汪方伯衡甫
訪請公朝夕督帶訓練幾成勁旅不意髮賊披猖郡城失
陷公繫眷避兵東鄉所有木排移泊鄉間迨賊散四鄉擄
劫災黎之避居木排者率多投水死公獨倉猝備棺掩埋

一日公見賊麇至躲避樓牆被驚墮下賊搜括多金而去
公腫痛卧床三日始起历年積蓄已盪焉無存惟剩木段
數百根渡運江北變售家眷僦居四墩子茅屋中時瘟疫
流行死亡相繼公目擊心傷以木段僱工成棺無力者聽
其取用有力者任其納價有急難相告者多如人意以去
然而懋遷有亡利輒三倍境况日以裕矣後遷海安鎮挾
鉅金貿易漢陽貲益富恒有親族向商無不畧給回籍川
資亂平里門創善後捐慷慨應之無吝色及歸里振興舊
業同族具沾惠澤焉公之恤困乏而好施與又如此公生

福根公傳

十七世

岳邦翰撰

公姓屠氏諱福根性豪爽知大義與兄福禧合居一室自幼至長無間言時粵匪亂鋒火徧野公常對其室宋孺人曰男兒生亂世不能建一策殺一賊是虛生也若城破我當以死繼惟上有親不克終養下有兒不得俯育此事皆累汝汝好自爲之未幾常城陷公悲憤無可計遂抱其子投河死此咸豐庚申四月初七日事也後經當道採訪上

達

宸聰得邀

旌典入忠義祠古人云雖死猶生殆公之謂乎余聞公死
難事綦詳今屠氏續修家乘爰書數語以誌梗概庶後世
子孫讀公傳而知其大節云

屠氏公傳

屠氏公傳

可漁公行述

十八世

府君諱有綸字翰文號可漁會大父丹厓公冢孫大父子
垣公長子幼聰穎早歲能文丹厓公嘗親自授經特鍾愛
之弱冠遊京師爲鄉先達所器重丙戌歲寄籍宛平以冠
軍遊庠是時卓海帆先生爲順天府丞特賞府君文優加
獎勵後五試棘闈闈藝一時傳觀而數奇不偶每不獲薦
或薦而不售時人咸爲惋惜而府君淡如也曰科名豈人
力所可強耶府君素體弱年逾三十時發肝疾遂無意於
進取知交愛府君文贈貲勸令付梓金曙洲袁素珊兩先

生爲之序府君不得已付劄牘題曰認我齋存稿蓋明其
求得乎我也詩集有淡吾軒手錄四卷詞及雜體文附焉
曙洲先生爲之序曰清新雋逸與時文如出一手讀之覺
拂拂清氣從紙上生信乎天授無疑清心寡欲喜靜室獨
居然秉性剛直不受屈撓與人交敦氣誼戒浮薄性真流
露不事修飾曙洲先生嘗贈語曰君乃血性男子氣節丈
夫非他人所可及然非先生與府君交厚亦烏得而知哉
侍庭闈惟謹待季父友愛嘗諳諳訓燁及弟等爲人處世
須寬厚祖宗元氣不可稍有戕伐燁謹識之不敢忘府君

卒於道光廿五年九月廿一日寅時距生嘉慶九年六月
十九日寅時存年四十有二前妣方孺人卒年二十有二
生姊一及笄卒母氏楊生

燁鈞 鉉

兄弟三人

長男 燁

謹述

根巖公傳

十八世

陸敏政撰

君諱本字根巖祖諱琪父諱湘君少穎悟歷覽經史識大義工書慨然曰官無尊卑致身則一捧檄娛親古人所尙奚必顯科名始得謂之顯揚哉循例報捐籤掣福建道光十六年候銓十七年以公事赴臺灣觀察某公知君廉直留臺補用十八年署鳳山縣典史獲盜保舉補汀州府甯化縣典史旋署臺灣府經歷值海氛不靖君防守四草海口晝夜巡警恃以無虞閱兩年積受海風濕熱遂得疾後稍愈廿五年漳泉兩府人民構釁總鎮帶兵往勦君奉派

糧臺事務料理餽饋兼管文移鉤稽出入夙夜無已以積
勞卒於軍營奏請無私閔兩平書受前風屬熱遊哲效勞
賜卹勅部臣覆覈部議文臣沒於王事照本官應升品級
加贈贈州吏目銜廕子一入監讀書

賜祭葬如例并卹其家

論曰士子束髮受書固當出其身爲國家用然慕妻子戀
鄉里老死牖下者比比然也若乃鞠躬盡瘁馳驅鋒鏑之
間畢命瘴海之地此偉丈夫之事也祭法曰以死勤事則
祀之君庶無愧焉

屠君可橋傳

十八世

陸慶頤撰

屠君爲本字樂融一字可橋封翁楚琇先生之孫植圃理
問之子也劬學敦行能文善書援例入太學應順天鄉試
遄歸省無頽氣翁性仁慈念親戚貧乏搔首歛眉君揣知
之適如翁意有負翁債久而不歸者翁或氣憤不平君密
告其人俄而如數以償老人輒然色喜君家食指衆多異
爨同財翁年逾八十久不問家人生產君三伯父毓町專
理外事世業理問一人主之君慮嚴親操勞太過入不敷
出袖手坐食勢將不支爰以儒習賈默爲營運利市三倍

年內助餉助賑兼應伯父不時之需多解私橐以佐公用
才益奇心彌苦矣翁纂修族譜將成謀建恤孤家塾爲族
中孤寒子弟讀書之地君敬謹贊成遵行無怠性慷慨樂
施予訪里中節婦孤兒之無告者隱爲贈恤久而無斁善
事大父母尊敬伯父叔父友愛從兄弟爲從兄蓉坡竭
力籌畫望從弟祿名專心誦讀全家疴癢相關垂死此心
不變歿前一夕執伯父毓町手曰伯父知覓心覓知伯父
心願伯父與吾父白頭同一心猶強起索紙筆所書皆語
不及私病亟凝視理問欷歔流涕曰兒不孝無過哀重兒

罪求大人節勞從容理家事祖父百齡家無分異兒死猶生也卒於咸豐戊午三月距生道光庚寅年二十有九配費前卒女三子一伯獻

陸慶頤曰君疾篤吳君旭仲往視謀挽救之術予急趨往封翁聞而垂涕默禱數十拜不能止扶而後起君以是日卒今厝矣毓町言及君輒泣下夫氣數之命在天者也義理之性在己者也在天者無可回在己者何可昧人能以氣數之命俟之天義理之性存諸己至性如君雖英年殞命與毫耄奚異哉

從子樂融哀詞

嗚呼吾從子樂融之歿也自吾父以至吾弟凡大功同服之人下逮家之臧獲媪婢皆哭失聲比厝又皆哭失聲鄉之人知樂融者無不流涕太息而一二賢士大夫間謂予曰君猶子賢然年少人未能盡知盍謀所以傳之者予曰唯唯然予不能文而以陸君鞠仁知樂融最深既乞爲之傳予於樂融舉念悽惻無一日忘亦不能已於言也予家承祖業吾父年及耄吾兄蚤世吾弟主家事予肆應於外而樂融維持其間往往弭釁於無形吾父欲有所施與常

先意承旨家之人有告匱者無不立應創建恤孤家塾教
族中孤寒子弟讀書出數百金供其費以圖永久賜恤嫠
婦孤子月恒出多金嗚呼自今以往吾父有所需誰爲左
右之耶予欲有爲誰與謀耶家人之匱乏者其誰告耶孤
寡貧困者誰爲之賜恤耶雖然樂融將歿之前一日起坐
索紙筆書諳諳然與予及其父言家事勉諸從弟及其子
讀書勤學雖老成人或不逮也樂融之所已爲者予及其
父固必終其志其爲之未盡所爲者亦必與爲之獨是予
有所爲遂無人焉與之謀也嗚呼予之恨曷其有極耶其

婦前卒十餘日而樂融歿年二十有九子尙幼其言行詳陸君所爲傳中樂融將歿予與之言曰汝神明不衰畢生敦善行不怠歿後何所爲夢中必來告予樂融頷之予曰望與之接而竟杳然猶不能不爲之望也

綴楚詞以哀之曰

春蘭兮秋菊綠葉兮紫莖荒忽兮望遠夜皎皎兮旣明孰離別兮可爲身旣死兮神以靈出不入兮往不返羌愈思兮愁人折芳馨兮遺所思日將暮兮悵望歸橫流涕兮潺湲心低徊兮顧懷

先考蔭堂府君暨先妣姚淑人行述

府君姓屠氏諱瑞椿字蔭堂先世自鄆遷常遂爲江蘇之武進縣人曾祖諱湘河南武陟縣知縣邑志有傳祖諱有綸考諱起鳳兩世皆不顯

贈如府君官曾祖妣姜恭人祖妣氏方氏楊妣氏楊皆贈淑人府君生有至性年數歲遭先大母之喪哀慟如成人遇祭日未嘗不流涕大父感府君意遂不復娶客遊楚北挈與偕往相隨寢處者十餘年迨學成然後遣歸就試時在同治十三年甲戌蓋府君甫勝冠云光緒紀元丙子丁

丑間從業師陸文泉先生遊屢試得高列願不售先生獨
器之妻以外孫女卽吾母妣淑人也淑人年二十來歸柔
嘉靜則鄉鄰稱賢時家貧甚身以外無長物淑人黽勉有
無不以累府君府君無兄弟有姊妹各一淑人待之如手
足摒擋嫁事典貸不足出奩中物佐之無難色庚辰長兄
孟康生逾年卽殤府君頻歲授徒居常悒鬱重以大父遠
客迎養無期望雲思慕遂慨然動功名之念歲辛巳外祖
姚彥森先生在吉林以詩見招卽日僦裝就道蓋府君之
作遠遊從此始抵吉後襄辦南園場放荒事按圖勘發調

理畢具諸公要人見者咸相嗟異時吉林展設電綫西由威遠堡邊門東過甯古塔委迤至琿春爲程二千餘里當道檄李觀察金鏞總其事觀察延府君辦文牘而採斫木植轉運電料悉以委之勞勩卓著工竣由吉林軍憲長彙案保奏十六年六月奉

旨俟補缺後以知州儘先卽補欽此蓋府君先已援鄭工例爲州同知云淑人白府君出遊卽移居外家以資倚畀明年壬午大姊生外王父適以事來南遂挈淑人俱出俾相從府君無內顧憂丙戌次兄生於長春廳署取名寬保

丁亥 不孝

方生大父聞而樂之與人信有丙丁兩載連得

兩孫之語蓋誌喜也府君夙負經世畧至是躬歷邊徼於北方門戶洞悉形勢往往流連時局形爲詠歌繪龍沙攬轡圖以見志時朝議開辦漠河金礦命李觀察履勘其地漠河在黑龍江迤北歷愛琿且千里荒渺無垠或以甌脫視之府君爲草開創事宜十六條指讎機要甄綜靡遺北洋大臣據以列奏事遂得行凡百草創文移咨稟旁午錯雜或至丙夜不能成寐一切籌邊通餉開設商埠調和中外諸章程悉經府君擘畫規置井然所以報答知遇者

在此而精力亦於是稍耗矣先是府君雖遠離膝下然一
二歲或二三歲必展覲一行至是睽違萬里音信遼濶不
勝思親之感淑人亦以爲婦多年未得一伺顏色引爲大
戚李觀察聞而感動且亦深慕大父之爲人因折柬聘請
來漠總司文牘以慰府君淑人之思處窳遠之地得庭闈
之侍至是心一慰焉未幾大父畏其地苦寒挈眷先返庚
寅二妹生府君養事三年列上上考奉 旨免補本班以知州儘先卽補並加運同銜 賞戴藍翎
并於報効軍餉案內 着補缺後以同知直隸州在任候

補欽此二十年春入都引
見籤分四川省府君奔走十餘年至是始得一官自效克
遂迎養之志今尙書鹿公方總制其地府君一見卽蒙識
拔許爲有用之才委解軍械江南尋委赴津偵探朝日戰
事丙申事平回省委署嘉定府榮縣知縣案多平反戶頌
神君明慎用刑輿情帖服興辦中西學堂仿胡安定經義
治事之例分課而治手訂章程并恭彙總署奏稿及李侍
郎端棻原奏序而刊之至今士子多趨實學由府君爲開
其風氣也春秋佳日淑人常手製餅餌命不孝導板輦出

遊流連詩酒道旁見者或爭獻花果爲太翁壽却之不可
大父知府君深得民心顧而樂之

不孝

竊窺大父天趣益

然府君精神煥發外瘁而神怡以爲家庭雍肆此樂方長
而孰知曾未幾年已成陳獲渺不可復追也去任之後兩
辦土釐局事裕課而不病民商情稱便己亥冬大府檄府
君至省駸駸欲大用之遽搆大父之戚府君隱痛刻骨疾
遂潛中而不可爲矣大父本有委痺之症行動需人至冬
月初六早起猶飲啖如常忽呼不適促府君等入迨家人
畢集已噤不能言醫藥祈禱無可措手故府君痛之甚及

疾病亦屏不服藥蓋府君自遭大故委頓床席者幾及半
年夏汎盛漲勢難逆發方俛至秋涼卽行扶柩回籍詎意
大府以府君熟精礦理冕甯鹽源辦礦歷年久無成效思
有以振刷之強委府君以行瀝情上告再三不獲

不孝年

幼又未獲隨待詎意府君哀毀之餘難禁瘴癘叩別之日
卽爲終天之日也嗚呼痛哉行後兩得手書惟兢兢以先

靈爲念他無所及

不孝

竊怪書詞簡畧不類往日然猶以

爲相見在卽故無假致詳而孰知恙已深沈隱忍而不欲
令家人覺也及接第三書始悉感寒抱病淑人當卽率

不

孝

馳赴省視行抵雅州遽得越檄來電府君已於閏八月

初六戌刻棄

不孝

而長逝矣病未侍疾殮不憑棺嗚呼痛

哉淑人本患痰症驟聆此耗一慟幾絕自雅至越嵩崎嶇
八百餘里勢難前往

不孝

侍母回寓守候湯藥勿敢再離

直至十月中始克迎府君靈襯安抵省城仰承 憲恩寅

誼救喪情篤俾得扶柩就道甫及登程淑人病卽增劇延

至重慶又復告殂先是淑人每舉聲一號卽

不孝

等躡躡

痛哭不能自禁淑人見

不孝

等哀思之切也因忍不復哭

然不言而神益傷終夕不復成寐以致於歿嗚呼痛哉府

君一生所歷多人所畏難而不肯赴者獨毅然任之以
底於成功淑人始境困約躬自刻苦其後雖處豐亨未嘗
使過此皆勤儉積苦宜享期頤之徵胡天竟奪之如此之
速又皆蒼黃旅殯使不孝并不能如尋常人子得盡問寢

嘗藥之末節也嗚呼痛哉府君生於咸豐六年三月初三
日距卒於光緒二十六年八月初六日享年四十有五歲
配吾母姚淑人 欽恤道銜吉林候補撫民府姚彥森公

長女生於咸豐九年九月二十九日距卒於光緒二十六年
年十二月初六日享年四十有二歲不孝方謹述

屠知州墓誌銘

二十世

光緒二十六年四川知州前榮縣知縣屠君卒越嵩冕源
礦局其後四年嗣子縣丞方奉行狀介其外舅盛君平章
來請爲誌案狀君練礦事自參吉林幕遂佐漠河旣官於
蜀惠氓益商得漸展布邁戚重毀不逮下壽重足悲惋者
也君十歲失母哀感如成人從尊人桂蓀封君轉客湖北
州縣間故成吏材辛巳歲奉外舅姚公韶理圍塲放荒事
展設電政咸合條理於時有陳奏事宜十六條之藁時佐
治李觀察金鏞所也旣而相得益密李公察君時時念親

專聘君尊人總文牘慰望雲之思焉遂保就職籤分四川
制府今尙書鹿公敦倚甚至其檄署榮縣慎刑創學舉正
綜密於時有彙序政書之刊迎養極孝孺慕動人及膺疚
疾刻自茹痛恍恂委頓亦屏醫藥夏沘暴盛勢無從歸厝
憂憾愈積大府計紆其戚於時有冕源勘礦之役非君志
也迫蹙上道留書哀悼讀者爲涕大府亦悔而君遂以閏
八月卒矣配姚淑人恭懿有禮灑家人咸以爲有彥森公
風彥森者 欽恤道銜吉林撫民府君所從練事姚公也
佐君致養無所逾越以哀君死孝卒後君不百日裁四十

二歲君亦裁四十五歲也君工臨摩積篋充宇牋奏編存者數十百冊官文書皆親手程無一字假人世方需才賢綜覈切事情清勤官逾難數數得君之卒豈但四川失一好官而已君諱瑞椿號蔭堂曾祖諱湘官河南有政績詩名冬心盦世所稱冬心先生者也祖諱有綸考諱起鳳皆不仕子一方女子子二乃爲銘銘曰

疇遊無親以習所忘大賢孝思感其居停疇不銜恤節變自解大賢盦心却藥而殆肫性摯節不必異材濬源滂流又精且恢過人者性不及者命闕之幽宮疇起時病嗚呼

哀哉日測盡人皆對不見清命閱之幽宮轉賦如蘇海

光緒歲次甲辰 波樂而或對對擊滑不為異林香而

賜進士出身前廣西荔浦縣知縣湖南臨湘吳獬頓首拜

誤 五十一 次女子子一 八 爲 論 論 上

名冬心畫畫視解冬心次主者出此章官餘者論論

洪百面已古驚聲林製製堂會而驚問而面百對

蘇波口車習流陣官餘製製製製製製製製製製製製

許波十百眼官文書習製毛野雅一寸野人川式須木

一二城在在處四十五正處也作工翻率詠製製製製製製

附錄

十四世屠鵠字丹山諸生精行楷有晉唐人風致人並稱之列縣志

十四世屠宗瑞字曜采性伉爽工弈好遊大江南北所至罕有匹者列縣志

十五世屠象儀字仲威著有曉春閣詩草尙未付梓

十五世屠怡雲字彭逸胸懷夷曠丰骨清稜著有詩草一

卷

十五世屠曾齡精於武藝聞於一郡

十六世屠瑛字崑華工於書法古貌古心不諧於俗

十八世屠應科字宗洛號梯雲工制藝遊京師不得志能詩善書弈居上品性狷介不能委隨於俗湖北學使某公延襄閱試卷傳聞泊舟江岸失足墮水長子元福拯之同時淪沒次子景福因未得真耗未敢成服

十四世屠... 山... 人... 道...

董孺人述畧

十二世

從孫南琛謨

董太君伯祖考文山公繼室少伯祖十有一歲以二十六歲來歸歸八年而寡年二十三文山公無子繼兄文昭公子誠立爲子文山公身後家四壁立太君向明而起母女二人惟以十指爲活未嘗向同室有所假貸甘貧矢節不苟言笑守節四十七年年七十有九合葬德安橋文山公之兆

洛書公配陸孺人傳

十四世

姪陸慶頤謨

慶頤常過屠君毓町家距四姑舊居不及半里每至追念
吾姑輒怛怛不已蓋自姑卒後姑之子介美旋卒姑之婦
依女婿居於鄉姑之孫流離死亡其老屋塵封有目不忍
覩者矣然及今屠氏修譜不爲姑闡揚潛德他日何以見
姑於地下姑爲大父兆文府君仲女以兄弟行居四適斗
巷屠洛書姑婿姑婿性木訥面黃患痔痔發甚憊呻吟床
席不善治生姑勤女紅以供饗飧常製青鞋鬻以度日鍼
傷血出天陰將雨骨節酸楚十指幾不可伸屈而事夫終

管太安人行述

十五世

太安人姓管氏爲毘陵望族前明禮部侍郎諱紹甯誠齋

公六世孫女太學生諱演泰來茲公次女幼失怙恃明決

識大體遇事有遠見年十八歸先考鶴渚府君旋先大父

疾革以家事付府君故太安人佐理家政侍繼姑徐孺人

先意承志兩夫妹時尙在室徐孺人鍾愛特甚太安人體

姑意委婉將順各厚爲贈嫁其後適湯適汪兩姑貧乏太

安人並周卹之年二十六生長兄琛又二年生琪又二年

生珂先府君性孝友與伯父玉繩公析產已久伯父不善

治生無子而有五女世母歿後府君仍請同居太安人善
事兄公撫諸女擇壻嫁之與己女無歧視府君爲琪等擇
師皆一時名宿尤喜延接文學知名之士俾廣漸摩家計
日艱太安人脫簪珥治饌具無少吝比琪等稍長結社論
文必命慎擇端士一日有里中貴介在座太安人適於屏
後見之呼琪等審客姓名乘閒謂府君曰吾家敦樸當導
子弟以循謹頃見客乃浮夸輕脫卽有雋才終非令器宜
謝弗與親後卒驗其卓識先見類如此歲乙巳珂選授山
西五臺令先府君已棄養迎太安人至官廨珂聽訟每有

決責太安人必徐問所理何事某甲何以加刑稍有過當
必正色曰此亦細事愚民無知尙可以情理貸也何任意
扑責爲深憫獄囚常密飭家人審視時節必散給食物歲
以爲常珂宰臺六年稟太安人教益務寬仁崇節儉邑中
未嘗苦旱至今民猶頌太君之德也珂秩滿遷福建延平
府通判取道里門太安人遂留不行誠珂曰比聞閩中宦
路險巘汝往當謀自立之道官身外物也毋貽先人辱老
母憂足矣珂抵閩制府奏調泉州府馬家港通判旋以民
犯畏罪自縊之案遭劾罷歸太安人曰余昔有成言如此

去官非私罪也未一年而閩省虧空案發同列論大辟及籍沒者甚眾珂獨以早劾罷不貽後累皆稟太安人教也

太安人年近八旬行不扶杖視聽猶昔珂罷官家貧無以

奉甘旨侍有兩兄侍側故薄遊燕趙藉筆耕作負米不數

年而先長兄

琛

暨長嫂

史氏

相繼殂謝恐傷老人懷抱遂

以癸亥歲晚遄歸覺太安人神明少減復苦肝疾時作時

愈詎料竟以此疾纏綿增劇遂致不起是皆琪等侍奉無

狀之辜也太安人持家有禮法一門子婦無詬諛語製衣

飾不效時世裝服物器用數年不易生平待人以誠尤善

曲體人不言之隱御僕婢有恩能容其過室中女奴年及笄者多爲擇配又以琪等食貧諸從省約晨夕奉甘脆少嘗輒止婉諭毋再新製衣裘一御後卽藏棄之仍服其敝垢者曰此吾所適太安人以嘉慶十年十二月初十日戌時卒生於康熙五十六年六月初十日卯時享年八十有

九

男琪

謹述

劉太孺人行述

十六世

先妣姓劉氏世居無錫之新橋鎮父

諱

鴻謨乾隆壬午科

舉人孺人歸府君時逮事大父母婉婉孝謹能得大父母
歡心待妯娌以和先大父棄養伯叔父以家業日落謀各
分爨以歸簡省府君授徒脩脯所入歲不過數十金湘兒
弟三人姊妹三人衣食所需暨冠婚喪祭往來酬酢皆取
給於是孺人親操井臼夜一燈如豆縫紉補綴至丙夜不
寐日以爲常甚或粥糜餬口一日不再食孺人絕不向戚
里告窘乏通有無時伯叔父境少裕姻黨往來疑有疎密

之分孺人欸接無異性不佞佛不茹素見勝於已者不生
妬心不若已者恨不解衣衣之推食食之年五十婚嫁畢

湘兄弟迭相奉養孺人始得稍節勤劬含飴弄孫 長子有

綸尤為鍾愛 湘筮仕河東深冀補官迎養乃以衰病纏綿

竟爾不起嗚呼是皆 湘之辜也先妣生於乾隆甲子十二

月初七日嘉慶壬申十一月廿六日卒與先府君合葬 男

湘謹述 人 諱 訓 晉 都 數 車 大 父 母 歟 歟 幸 勤 前 哲 大 父 州

大 披 披 隆 引 廿 廿 無 難 之 際 辭 難 父 解 斷 藉 諱 劉 壬 子 時

隆 太 謙 人 谷 遊

陸太孺人述畧

十六世

胞弟黻恩技淚謹述

嗚呼自聞吾姊之赴於今已一載矣山川阻深日月逾邁
兵戈滿地旅殯無歸每讀仲氏吾寡兄弟而勿忍之言輒
北向長號潛言出涕思欲銜哀攄誠而搦管之際不能吐
一詞作而輟者屢矣今因外家纂修家乘情不能已爰吮
淚濡墨而爲之述云吾姊先考湘川府君先妣屠太孺人
之長女年二十歸外氏之宗屠與陸爲世姻望衡對宇若
一家然姊壻松舟諱慶簪善書記橐筆遊東諸侯者數十
年姊在家侍翁姑翁姑俱年邁姊謹事之無幾微怠色有

無黽勉凌雜米鹽椎髻提甕不敢言勞以是得順名於里
郇迨翁姑相繼殂謝姊以一身當大事盡哀盡誠咸合禮
意逮甥爾彬長就婚呂氏時甥女亦歸於呂姻家方居德
州松舟因挈眷同居姊初不欲行疆之乃可瀕行舉家中
薄田每年所收穀米如千市廛僦值如千以分親族之貧
者厚薄必均又與其兄公慶瀾夫弟慶祿慶安共贖元美
公所遺祭田一十六畝爲春秋享獻之資勒碑垂後俾先
人永無廢祀松舟之歿也姊與甥扶柩歸謂族人曰吾家
固貧約今幸吾兒需次山左較親族之不能自存者差疆

人意何忍遽奪其貲乎故自始迄今三黨之蒙其惠者十
餘年姊自奉甚儉嗇而篤於行義如此可謂豐約適宜者
矣自粵氛日熾烽火直抵大江金陵京口相繼失陷姊憂
念祖宗坟墓戚族仳離每南望慟哭及高唐臨清告潰德
州適當孔道風鶴日聞因以成疾疾劇不肯治默焚香祈
死卒之日爾彬方賫餉入都僅吾兄以璜視含殮焉傷哉
卒以咸豐甲寅三月二十八日距其生嘉慶己未十二月
二十八日存年五十有六子一爾彬山東候補從九品歷
署濟陽曹縣典史女一適山東平原縣縣丞呂高澤自姊

之往德州也余屢與計偕每出入必過德存省姊及姊扶
柩歸余適有豫章之役臨別依依不忍釋孰謂竟成永訣
也傷哉自是厥後余亦不復赴公車矣惟翹首塵清以待
姊喪之歸憑棺一慟而已嗚呼姊之懿行殆不勝書奈一
注念則悲從中來心緒瞶亂不復能文聊撮其一二大者
叙其涯略如右

姚宜人傳

十六世

陸慶頤撰

宜人姓姚氏諱廷發公長女封翁楚琇先生之德配吾友
潤芝兄弟之賢母也年十九歸封翁翁本生父宏聲府君
暨嗣父再榮府君蚤卒逮事翁兼祧正榮府君恪循婦職
初歸時家極貧困宜人安之無憂戚容佐夫子勤儉治生
有亡黽勉生五子二女左提右挈飲食教誨兼以料量中
饋蓋夏不扇冬不裘明而動晦未休有操勞我獨者焉道
光初年家境稍裕絕不嗜鮮衣美食無華靡習十二年正
月七日卒年五十有五以子培芝貴贈宜人

陸慶頤曰封翁今年八十步履如五六十歲人前十年納
遘室生一子名熙芝出就傅矣然以宜人蚤歲同艱苦歿
已二十餘年言及宜人猶悼惜不置况乎為其子者哉

齊力顯數主廿七二女字與古學猶負其端兼以林壘中
所種和寒冽貧困直人安之無憂如容於夫年世劍常主
碧圃交再榮亦皆蚤卒盡事餘兼撫五榮亦皆都滿誠如
歸芝兄弟之賢也也年十六讀詩餘餘本主父志擊亦得
宜人披披以歸我翁公具文持命焚紅表主之齋則焉式

淑宜人辭

十六

劉勳題

賀孺人傳

十六世

陸敏政撰

孺人姓賀氏成祖公女歸屠君景和名謙益孺人于歸時家業頗裕四五年間家業稍落薪水屢空孺人無怨色順事舅姑相夫子黽勉有無時漪園楊先生官於閩與屠君友善屠君贏糧從之爲管記室歲寄脩脯七八十緡備菽水資孺人悉奉堂上孺人益勤帶紵以待乏晨餐夕膳無缺於供迨舅歿姑失明孺人扶持出入抑搔苛癢終日夜不倦姑年邁易怒孺人惋愉受之侍姑疾親調湯藥凡勞辱之事悉孺人任之不推諉妯娌姑年八十一而終孺人

後姑二年卒道光十八年九月十六日也年五十有八子
五人洪增洪塏洪堦洪琇洪琅女一適趙廷楠

論曰咸豐五年屠氏修宗譜得晤孺人第四子洪琇述其
八九歲時從族叔文階學大父怡園公特鍾愛琇每午飯
時大父輒至塾攜琇歸侍食於旁旨甘柔滑皆洪琇餽孺
人親作羹膳佐加餐飯及退適孺人之所而孺人尙未暇
朝饗也厥後琇兄弟輩以勤儉謀生家業復頗裕而孺人
竟卒嗚呼天之報施善人不以所甘償所苦抑獨何哉

亡妻姜宜人墓誌銘

十七世

湘謨

宜人姜姓世居常郡西橫林歲貢生候選訓導諱雲翎公
長女二十三歲來歸宜人自幼純謹工針黹喜閱孝經列
女傳及有關名教之書予廿餘歲曾患咯血症醫者咸謂
不治宜人盡心調治得稍痊以家徒四壁遊幕淮徐間時
兩女已數歲宜人撫育備極艱辛歲甲子長子有綸生予
館松太觀察署薄有館穀以濟薪水丙寅次子本生庚午
三子道立生予時援例報捐分發東河宜人在家奉侍久
而罔懈壬申秋吾母劉太宜人得疾宜人親嘗湯藥衣不

解帶者累月迨吾母見背湘星夜馳歸太宜人喪已將

匝月旋先府君棄養湘復以謀食之故不得親視含斂終

天抱恨幸附身附棺宜人兩次經理必誠必信壬午春予

補官南陽宜人挈子婦來署因長婦方氏天亡宜人睹景

傷懷時時墮淚今歲六月初十日忽患嘔吐腹疾越兩日

默無一言端坐瞑目而逝宜人性婉寡言笑不談人短

不炫己長見年老貧苦者卽已竭蹶時必量加周恤待臧

獲蠶而有恩尤惜字紙必親自檢拾謂讀書必先惜字再

三諳囑兒輩戊子令兒子有繪本扶襯回里卜地安葬爰

爲之銘曰

卅載相予實爲良助
疾疾突來促駕何遽
舍我長遊魂兮何處

姚孺人傳

十七世

陸慶頤撰

孺人姚氏諱景濂長女年十九歸屠君毓町名潤芝善事
舅姑姚太宜人以姪爲婦尤愛之年及壯生二女子一名
祿安不幸而殤獨居深念常勸毓町置造室曰君幼承嗣
大父鍾愛如無子正榮府君其能衍然歆此享祀乎毓町
應以兄弟之子猶子也奚患焉故孺人初置江北女子毓
町不索值潛遣之繼買盛氏女婢毓町復焚券善嫁之蓋
毓町欲以弟培芝次子爲子迨生七歲而殤孺人哭之慟
益鬱鬱不樂居恒病病幾殆適舅往靖江孺人跪白舅求

爲夫子卜妾得唐氏女載以歸孺人見之病霍然愈懽笑
逾於平時道光庚戌孺人以疾卒年五十已親覩唐生男
子子二祿名祿受孺人歿前一夕猶訓勉唐惓惓不置云
陸慶頤曰吾友屠毓町道孺人三爲納妾事孺人以不妬
爲德尙已重念先人禋祀其孝思尤有足感者而毓町恐
損兄弟之愛賢如孺人曾不輕聽皆可爲後世法故備錄

之故淑太宜人以誠爲淑太愛之半又其生一女子
淑人淑人結景新其文半十此淑人昔其四合歸之善也